

## TUSI AOGA ASO SA 2015

### VASEGA FEOLOOLO

#### FAASOLOGA O MATAUPU I ASO SA TAITASI

#### MANATU AOAQ: “O LE ATUA I TOTONU O SUIGA”

#### FEPUARI: O LE ATUA LE FAAVAE TUMAU

|    |   |                |
|----|---|----------------|
| 8  | O le uluai Aso malolo o le Fofoaga<br>(ASO SA O TUPULAGA) | Kenese 2: 1-3  |
| 15 | Ia ō faatasi le Papatiso, ma le salamō                    | Mataio 3: 7-10 |
| 22 | Ua liu gata le to’oto’o                                   | Esoto 4: 1-5   |

#### MATI: O LE ATUA E MAUA AI LE TALI O OU FAAFITAU

|    |   |                   |
|----|---|-------------------|
| 1  | Ua faasaolotoina Isaraelu               | Esoto 12: 29-36   |
| 8  | Ua vivii Hana i le Atua                 | 1 Samuelu 2: 1-10 |
| 15 | O le vavega na faia i Petesa            | Ioane 5: 1-9      |
| 22 | Ua laveai e Iesu le fafine mulilua      | Ioane 8: 3-11     |
| 29 | Ua afio mai le Tupu<br>(ASO SA LAUPAMA) | Mataio 21:1-11    |

#### APERILA: IA MANATUA LE ATUA I A TATOU FUAFUAGA FAI

|    |  |                    |
|----|--|--------------------|
| 5  | O le ola i tala atu o le oti<br>(ASO SA TOETU) | Mareko 16: 1-8     |
| 12 | Sei tatou su’esu’e i o tatou ala ma filifili   | Auega 3: 34-41     |
| 19 | Se a foi se mea tou te loto i ai?              | Mareko 15:1-15     |
| 26 | O le tulafono po o Keriso?                     | 1 Korinito 7:17-20 |

#### ME: O LE ATUA E MANATU MAI

|    |  |                  |
|----|--|------------------|
| 3  | Fa’aali le Atua ia Palaamo                         | Numera 22: 22-31 |
| 10 | Apoapoaiga a le tinā alofa moni<br>(ASO SA O TINĀ) | Faataoto 31: 1-9 |
| 31 | E magalo agasala ia Iesu                           | Mareko 2: 1-12   |

#### IUNI: E PULE AOAQ LE ATUA

|    |                                   |                 |
|----|-----------------------------------|-----------------|
| 7  | Ua faatumaaina le la ma le masina | Iosua 10: 12-15 |
| 14 | Ua sopoa e Isaraelu le Ioritana   | Iosua 3: 14-17  |
| 21 | Ua toe faaolaina mai Lasalo       | Ioane 11: 38-44 |
| 28 | O le vai ua liu uaina             | Ioane 2: 1-11   |

#### IULAI: E I AI LE TAIMI O LE ATUA

|    |  |  |
|----|--|--|
| .  |  |  |
| 5  | Ia lafoai e le tagata agasala ona ala          | Isaia 55: 6-9  |
| 12 | O le asō ta te faatasi ai ma oe i le parataiso | Luka 23: 39-43   |
| 19 | O le loto faamaualuga                          | Tanielu 4: 26-33 (Vasega)<br>Tanielu 4: 19-33(Faiaoga) |
| 26 | Ona atamai ai lea o ia                         | Luka 15: 11-24   |

#### AOKUSO: FAAILOA LOU TAGATA TALITONU MONI I LE ATUA

|    |  |  |
|----|--|--|
| 2  | Alofa taumulimuli e oo i le oti                      | Ruta 1: 14-18                                      |
| 9  | Usitai ia Iesu, a’e tu’u lou iloa<br>(ASO SA O TAMĀ) | Luka 5: 1-8  |
| 16 | Liliuina Saulo e le Alii Toetu                       | Galuega 9: 1-9                                     |
| 23 | E lei pepelo Hana i le Atua                          | 1 Samuelu 1:14-28                                  |
| 30 | Muai saili i le Atua i le tatalo                     | Neemia 2:1 – 8 (Vasega)<br>Neemia 1:1-2:8(Faiaoga) |

**SETEMA & OKETOPA: O LE TALA LELEI MAI LE ATUA  
E SUIA LE OLAGA O LE TAGATA**

**SETEMA:**

|    |  |                 |
|----|--|-----------------|
| 6  | E tatau ona salamō<br>(ASO SA TALALELEI) | Iona 3: 1-10    |
| 13 | Faalogo ma talitonu                      | Iosua 2: 8-14   |
| 20 | A valaau mai alu loa                     | Mataio 4: 18-22 |
| 27 | O le faatuatua e faailoa i galuega       | Galuega 4:32-37 |

**OKETOPA:**

|    |                                    |               |
|----|------------------------------------|---------------|
| 4  | Tala puupuu mo le Lotu Tamaiti     |               |
| 11 | Lotu Tamaiti                       |               |
| 18 | Malologa o le Lotu Tamaiti         |               |
| 25 | Aua e te maitauina faaletonu o isi | Mataio 7: 1-5 |

**NOVEMA & TESEMA: NA FAIA E LE ATUA MEA UMA  
INA IA MATAGOFIE**

**NOVEMA:**

|    |   |                  |
|----|---|------------------|
| 1  | O le malamalama ma le pouliuli            | Kenese 1: 1-5    |
| 8  | Ua vavao e Iesu le matagi ma le vai       | Mataio 8: 23-27  |
| 15 | O le Tapuaiga i le Atua le ola faitaulaga | Kenese 22: 5-12  |
| 22 | Ua vaeluaina le sami ulaula               | Esoto 14: 15-22  |
| 29 | Ua silasila atu i ai le Atua ua lelei     | Kenese 1: 20- 25 |

**TESEMA:**

|    |                                |                |
|----|--------------------------------|----------------|
| 6  | Tatou alalaga fiafia i le Alii | Salamo 98: 1-6 |
| 13 | O le Pese a Maria              | Luka 1: 46-55  |

.....

**MANATU AOAQ 2015: “O LE ATUA I TOTONU O SUIGA”**

**MANATU TAIALA FEPUARI: O LE ATUA LE FAAVAE  
TUMAU**

O le maualuga ma le saosaoa o le atamai ua i ai i nei ona po, ua tele vave ai foi ma suiga i lo tatou olaga ma le siosiomaga o i ai i nei aso. Ua iai suiga i tu ma aga sa masani mai ai, ua iai foi suiga i taiga o le ola o aso fai so’o (life style); Ua i ai suiga i upu o gagana, atoa ma isi mea e tele. Ae o le itu taua, e lē o mafai lava e lea poto ma le malosi ua iai suiga o nei aso, ona suia Lē na ia faia mea uma, “O LE ATUA LEA” Upu lava a le Atunuu, “E sui faiga, ae tumau faavae.” E tumau lava le Atua lo tatou faavae e faavavau.

**ASO SA: 8 FEPUARI 2015**

**MATAUPU: O LE ULUA’I ASO MALŌLŌ O LE  
FOAFOAGA.**

**SINI:** Ia a’oa’o tamaiti ia latou iloa lelei, o le galuega o le Foafoaga a le Atua i le amataga, sa faataoto mai ai lava ma le ulua’i aso malŌlŌ, o lo o faamamaluina lava e o’o mai i aso nei. (O le Aso Sa lea).

**TUSI FAITAU:** Kenese 2: 1 – 3

**FESOASOANI MO FAIAOGA:**

(i) O le mataupu muamua o le Kenese, o lo’o faamatala auiliili ai le tala i le faia e le Atua o le lagi ma le lalolagi i le amataga, atoa ma mea uma lava o iai, o aofia ai ma le tagata. O le tala i le galuega atoa mai le aso muamua e oo i le aso-ono. O le aso-fitu, o lo o amata ai le mataupu e lua, e leai se galuega e tasi na faia ai e le Atua. Na māea uma galuega i aso e ono, ona malŌlŌ lea

o le Atua i le aso-fitu, na ona ia faamanuia i ai i le aso-fitu, ma ia faasāina (O le vaoia lava lea o so o se galuega ona faia ai, ae faamamalu ma faapaia o le aso malōlō) sapatu e faamamalu e tagata e fai ma aso e tapuai ai i le Atua, Lē e ona le aso.

(ii) O le faitauga faa-Iutaia, o le aso Sapatu o le aso fitu, o le aso Toonai lea. Peita'i, o le faitauga faa-Kerisiano o aofia ai ma le E.F.K.S., o lo o faamamalu le taeao o le manumalō, Aso Sa o le Toetu, e avea ma sapatu e malōlō ma tapua'i ai i le Atua. O le amataga o le foafoaga fou i le ulua'i aso, o le Aso Sa lea

(iii) O le Aso malōlō, o le aso lava na pogai mai le Atua, auā o lona lea finagalo. O se fuafuaga e iloa ai lona lava Mataisau, auā o Ia lava o le poto ma le atamai. O se taiala tatau ma aogā tele mo lana tagata na fai, i lona ola galue ma auauna, auā o le taimi malōlō, o le avanoa sa Ia faasaina e malōlō ai, o le avanoa e toe fafaga ai le malosia i le tino, mafaufau, ma le agaga, mo isi foi feau e tele o agai mai. O tatou le fanau, a tele feau e fai i lea aso ma lea aso, e matuā lagona le vaivai o le tino, vaivai le mafaufau, ma lagona e le loto le fiu. O le taua la o taimi malōlō, e pei ona faia e le Atua pō o aso taitasi, ma le Aso Sa o vaiaso taitasi, o avanoa e toe faafoisia ai le malosia fou i tino, mafaufau ma loto.

### **GALUEGA FAATINO:**

(a) Fetufaaiga e ala i Fesili ma Tali

1. O ai le tamaitiiti po o le teineitiiti o la tatou vasega, e fiafia i le aso malōlō ua faia e le Atua? A'o ai e lē fiafia i ai?

Tali: O le tali Ioe, e fiafia! Po o le leai, e lē fiafia! O le a e silafia ai ua malamalama tamaiti pe leai foi.

O i latou e lē fiafia, toe fesili i ai pe mafua i se ā lo latou lē fiafia, e saga faalatele ai le mataupu. Auā e tatau lava ona iai ni mafuaaga o lo latou lē fiafia.

2. O a ni lelei i lou olaga faa-le-tino, o lenei aso malōlō ua faia e le Atua?

Tali: Ua mapu ma malōlō ai mai le tele o feau.

Ua maua ai le avanoa e toe faafoisia ai le malosia.

3. O le a se lelei i lou olaga faa-le-agaga, o le aso malōlō ua faia e le Atua?

Tali: Mafaufau ai i le Atua.

Faatumau ai pea le ola tapuai i le Atua

Toaaga ai e faitau le Tusi Paia ma o i le Lotu.

**PESE :** 207 (Le malologa e lelei, le Aso Sa i lalo nei)

### **A'OA'OGA:**

1. E taua le malōlō.

2. Faamamalu le Aso Sa o le Alii.

3. E poto le fuafuaga a le Atua.

### **TATALO:**

Faafetai i lou alofa tumau mai mo i matou uma lava le Atua. Faamagalalo lo matou vaogata, ma le lē usiusita'i. Lavea'i mai matou i le tafafao vale i taimi malōlō ua e aumai, ma lo matou lē fiafia i le lotu i le Aso Sa. Amene.

.....

**ASO SA: 15 FEPUARI 2015**

**MATAUPU: IA Ō FAATASI LE PAPATISO, MA LE SALAMŌ**

**SINI:** Ia a’oa’o tamaiti, ia latou iloa ma malamalama lelei, o le papatisoga i le vai ua na o se faatinoga, a’e faatoa atoatoa, ina ua liliu le loto ua salamō, ma alu ese faamaoni mai le agasala.

**TUSI FAITAU:** Mataio 3: 7 – 10

**FESOASOANI MO FAIAOGA:**

- (i) O Ioane lenei o lo ta’ua i le Luka 1: 13; o le tama a Elisapeta, a’o le atalii o Sakaria. Ua igoa nei o ia o le “Teuteu ala” po o “Ioane le papatiso”, ona o lana galuega ua valaauina i ai o ia. Sa galue o ia i Iutaia; o lana galuega o le ta’u atu, faamalosi ma faamautū i tagata le malō o Iesu lē o mulimuli mai. O lona uiga, e taumafai e ta’u i tagata, e lafoa’i le leaga ma ðese mai o latou ala agasala o fiafia i ai, a’e saunia o latou loto i le talitonu faamaoni, mo Iesu ma lona malō. O le uiga lea o lona igoa, “o le Teuteu-ala”, ona na te saunia ma teuteu loto o tagata ina ia talia Iesu. A o’o la ina lagona e tagata le upu a Ioane ma talitonu ona papatisoina lea o i latou i le vaitafe o le Ioritana. O le faailoga o le faamamāina, a’e fa’aatoatoaina e le Agaga o le Atua pe a afio i totonu o o latou loto.
- (ii) **Satukaio ma Faresaio f .17:** O i latou nei, o isi lava vaega o tagata o le Lotu Iutaia. O tagata Iutaia, o tagata filifilia e le Atua, na tupuga mai iā Aperamo lē o ta’ua, o le tamā o le au faatuatua. O lo latou so’otaga lea ia Aperamo, ma lo latou tulaga filifiliaina faapitoa e le Atua e aveva ma ona nu’u, e mimita ai lava tagata Iutaia ma faamaualuluga i ō latou faiā ma so’otaga ia, ma manatu ai. O latou lava ia o tagata e faaolaina,

lē afaina pe agasala ma lē lelei. O lo latou omai la i le Papatisoga a Ioane, ua na o se gaioiga i luma o le vaaiga a tagata, a’e leai se loto faamaoni o i ai, e liliu’ese ma salamō mai o latou leaga ma agasala. Ma o le ala tonu lenā o le faapea atu i ai o Ioane – “O latou o fanau a gata feai, ua manatu e sosola ese ma faasaoina mai le toasa o le Atua atali. (Faamasinoga mulimuli lea i le taimi e oti ai) ona o lo latou so’otaga lea, ma le leiloa, seiloga lava e salamō ma ðese mai le leaga. Ma o le uiga lea o la tatou mataupu, o lo o faasino tonu i tagata nei (Faresaio ma Satukaio), e lē na o le papatisoga e pei ona latou manatu ai, a’e faataua ma loto ia salamō faamaoni. Ia latou iloa le uiga o le, “matau o lo’o tu’u i le tafue o laau.” O le tagata lava po o le laau e lē fua mai i ni fua lelei, e tā i lalo ma susunu i le afi.

- (iii) Tamaiti, e tāua lou alu i le aoga, a’e o le mea sili, o le faamaoni e faalogo lelei i le faiaoga ma taofi, ma toaga e suesue au mea-aoga. O le mea aupito sili lena ona ta’ua; Auā o le ala moni lena e te poto ai, ma lavea’iina ai oe mai le valea.

**Uiga o Upu ma Fuaitau:**

- i). (f.7) Faresaio - O le ituaiga lea o tagata lotu-Iutaia, e mulimuli lava latou ma tumau i tulafono faa-Feagaiga Tuai, e tusa o a latou tu faa-le-tapuaiga. Latou te lē taliaina Iesu ona e lu’itauina pea e Iesu lo latou ola mitamitavale ma o latou lagona. O se ituaiga e fa’aaloaloga tele e le sosaiete o tagata Iutaia.
- ii). Satukaio - O le vaega lea na o tusi lava e 5 a Mose, e talitonu latou o le Tusi Paia lenā (Penetatuka) E le talitonu i se ola i tala atu o le oti, o le ala lea e tete’e uma ai ma Faresaio iā Iesu.

- iii). papatisoga - O le faasusū (faatofu pe faasinasina) e fai ma faailoga o le tagata ua faamamāina ana agasala, a'e ua liliu nei lona loto ma avea ma tagata lelei (salamō)
- iv). toasa - o le ita, lē malie, lē fiafia
- v). atali - faavavau, fai ai pea
- vi). f.(10) matau - to'i (uamea maai e fai lona 'au e tipi ai i lalo laau, ma tātā ai fafie o le umu)
- vii). tafue - pogati o le laau.

### **GALUEGA FAATINO:**

1. Taumafai e fai se faatinoga pu'upu'u o le tala. (Ia iloa le galuega a Ioane, ma le uiga manatu mamā o Faresaio ma Satukaio)

**PESE:** 235 (Ieova e le Atua)

### **A'OA'OGA:**

1. E lelei le salamō.
2. Faatuatua i le Atua
3. O tatou o laau fua lelei, pe a tatou talia Iesu.

### **TATALO:**

Faafetai tele lo matou Atua mo le ola manuia o lau fanau i lenei Aso Sa, ona o lou alofa ma lau tausiga agalelei ia i matou. Faamagalalo lo matou ola faafoliga i ou luma. Faamanuia Samoa ma le lalolagi, atoa foi ma le alu o lau Tala Lelei i lenei Aso Sa. Amene.

.....

**ASO SA:** 22 FEPUARI 2015

**MATAUPU:** UA LIU GATA LE TO'OTO'O

**SINI:** Ia a'oa'o tamaiti ina ia latou iloa le mana ma le mafai o le Atua fai vavega na te mafaia ai so o se mea e finagalo ai, e pei ona ia liliuina ai le to'oto'o e avea ma gata.

**TUSI FAITAU:** Esoto 4: 1 – 5

### **FESOASOANI MO FAIAOGA:**

- (i) O le valaauina o Mose e le Atua, e pei ona ta'ua i le Esoto 3: 1(ff) o lo'o atagia ai lona musu ma lona le fia alu, e ui ina ia iloa, o le Atua o lo o valaauina ia. O le Esoto 4: 1 – 5 lenei, o lo'o tumau lava le lē manao ma le fefe o Mose e alu, e le gata o lo'o leoleo ana manu, ae o le tele foi o mea ua ia vaaia ma mafaufau i ai i luma, e ono tutupu ia te ia, Ma o le ala tonu lea o le fai e le Atua o le vavega i le to'oto'o sa ia u'u i lona lima; ina seia ia iloaina ma talitonu, e le gata o i le Atua le mafai o so o se mea, a'e lē tu'ua foi e le Atua so o sana auauna na tofiaina mo ana feau.
- (ii) O le to'oto'o o le leoleo mamoe, o se laau pe tusa o le 4-6 futu lona umi, ma lona vaega e u'u ai i le pito i luga, e lolo'u pei o se faamatau. E fa'aaogā e le leoleo mamoe le to'oto'o e lagolago ai lana savali; puipui ai ana mamoe; e lave mai ai i luga ma faasao mamoe pe a pa'uū i lalo o se vanu; fasi mate ai gata feai, ma le tele o isi mea aogā e fai ai. E ui lava i le tele o nei aogā o le to'oto'o, ae ua na o se fasi laau lava. O le faia la e le Atua o le vavega e pei ona sa tatou faitau nei i le faia o le to'oto'o ma gata. E le gata e fai ma faamaoni o le Atua iā Mose, ae ta'u atu ai foi iā Mose, o tatou ua na o ni tagata faatauvaa lava, ae mafai ona fa'aaogaina ma faia e le Atua ma fa'aaliga o lona mana, i taimi o la tatou auaunaga mo ana feau e finagalo ai.

(iii) O le vavega, o le ta'u lea e ta'u ai le mea atoa na faia e le Atua. Faatonu e le Atua Mose e lafo i lalo i le eleele le to'oto'o sa u'u i lona lima, ona faapena lea ona fai, ma vaايا ai se mea uiga ese, o le to'oto'o ua liu gata. O iina na fefe ai Mose ma sola ese. Ae fetalai i ai le Atua toe tago i lona i'u, ona faapena lea, ma ua toe liu to'oto'o foi. Alu laia, Mose, o le a faapena ona faia e le Atua, ina ia latou iloa ma talitonu, o A'u o le ola, o lo o ola lava, o le Atua lena na auina atu oe.

### **GALUEGA FAATINO:**

Faaua mai e oe faamatalaga o i lalo, i ni au lava upu e iloa ai ua e malamalama i le tala.

1. O lau faitau i le f.1 o le Tusi Faitau, o lo'o iloa ai le fefe o Mose ia Farao ma tagata Aikupito, ae ua silisili ai ona manino lona ..... i le Atua.

Tali: Le faatuatua/le talitonu/le ustai/etc.

2. O le f.4, o lo o iloa ai na tago Mose i le i'u o le gata, a'e le o lona ulu, ua le utia ai o ia e le gata. O le lelei lena o le .....Atua, e le aafia ai.

Tali: Usitai/Faalogo/fai o le mea e faatonu mai e le Atua.etc.

3. O le f (5) i le ulua'i laina lava e faapea, "ina ia latou talia mai" O le upu "latou", o lo o faasino ia ....., a'e le o Aperaamo, Isaako ma Iakopo.

Tali: Aikupito.

4. O le liugata o le to'oto'o, o le fa'aaliga o le ..... o le Atua ia Mose.

Tali: Mana/malosi/mafai.

**PESE:** 182 (f. 1, 3, 4)

### **A'OA'OGA:**

1. E mamana vavega o le Atua.
2. E aoga le to'oto'o.
3. E matautia le gata.

### **TATALO:**

Faafetai alofa mai i Faiaoga ma le Aoga Aso Sa atoa i lenei taeao. Faamanuia lo matou agai atu i le tapuaiga, faatasi ma ou tagata uma lava i lenei Aso Sa. Faamagalalo Samoa mai sesē ma agasala. Amene.

.....

### **MANATU TAIALA O MATI: O LE ATUA E MAUA AI LE TALI O OU FAAFITAU**

E toatele nisi o lo o tausaili ma manaomia ni tali i o latou faafitauli ma mafatiaga. O faafitauli ua loa ona latou feagai, e pei o ma'i o le tino, o le ola pologa ma le saisaitia, o manaoga e fia faataunuaina, ma nisi lava faafitauli. O mataupu o lenei masina, o lo o faailoa ai ua na o le Atua lava, e maua ai le tali ma faia suiga i nei faafitauli.

**ASO SA: 1 MATI 2015**

**MATAUPU: UA FAASAOLOTOINA ISARAELU**

**SINI:** Ia a'oa'o le vasega ia malamalama o le Atua lava na faasaolotoina ia Isaraelu mai lo latou nofo pologa ai i Aikupito.

**TUSI FAITAU:** Esoto 12: 29 – 36

## FESOASOANI MO FAIAOGA:

Ua tele tausaga o nofo pologa pea ma puapuagatia Isaraelu ia Farao ma Aikupito. Ua tofia foi e le Atua Mose e fai ma avefeau e momoli lona finagalo ia Farao ina ia faasaoloto Isaraelu. Peitai, e lei faigofie ia Farao, e lei manao e tuu atu Isaraelu e o. O le mafuaaga lea o le tuuina atu i ai e le Atua o mala ia Farao ma Aikupito, sei faailoa i ai ua finagalo e faasaoloto lona nuu.

E ui i le matautia o mala e iva na muamua, ae sa le mafai ai lava ona suia le finagalo o Farao. Peitai, o le mala lona sefulu lea na fasitoia uma ai ulumatua a Aikupito, ma ulumatua a manu, o iina na suia ai le manatu o Farao. O se aso o le tagiaue i le nuu atoa o Aikupito, aua e leai se aiga na sao mai i le oti. Ua aami e Farao ia Mose ma Arona ma fai atu i ai “Ina tutū ia, o ese atu ia i lo’u nuu, oulua atoa ma le fanauga a Isaraelu, o atu ia outou ma auauna i le Alii, faapei ona oulua fai mai na.” E le gata i lea ae ua faataga foi ia Isaraelu, ona ave o mea uma o lo o ia i latou, e pei o lafu mamoe ma lafu povi. Ua faapea foi ona talosaga atu Farao ia Mose ma Arona, ina ia la faamanuia atu ia te ia, ma ua mananao foi o ia ma le nuu uma o Aikupito ia vave o ese loa Isaraelu. O mea uma lava na mananao i ai Isaraelu latou te aveina, sa faapea ona tuuina atu i ai e Aikupito e o ma i latou. O se auala lea na saunia e le Atua ina ia faamativaina ai le nuu o Aikupito.

Tamaiti, o le faasaolotoina o Isaraelu, o se mea lava na faia e le Atua, e ala i le fa’aalia o lona silisili ese, ina ua fasiotia ulumatua uma o Aikupito, ae faasaoina lona nuu, ina ua latou faataunuina le tausamiga o le paseka, e pei ona faatonuina ai i latou e le Atua. E fasia e aiga uma se tama’i mamoe po’a e sao ma lelei e tasi lona tausaga e aai ai. E ave foi se vaega o le toto o le mamoe ua fasia ma vali ai pou e lua o le faitotoa ma ona faalava, ina ia fai ma faailoga i ō latou fale, ina ia lē afaina ai i le fasi tele ma le malaia o le a faia e le Atua i ulumatua uma o Aikupito.

## Uiga o Upu ma Fuaitau:

i). Esoto - si’i a’e i luga, ma ave ese.

ii). tulua o po ma ao - ta o le 12 i le po.  
iii). faatagataotauaina - o se tagata na maua mai i se taua na fai, ma avea ai ma pologa.

## GALUEGA FAATINO:

Taliga Fesili (fa’aaogaina le Tusi Paia)

1). O le a le mala mulimuli na oo ia Aikupito o lo o taua i le tala?

Tali: Fasiotia ulumatua uma o Aikupito.

2). O le a le taimi o le aso na tupu ai lea mala?

Tali: Tulua o po ma ao.

3). E faapefea ona iloa, ua suia le finagalo o Farao?

Tali: Ua ia tuuina atu le nuu o Isaraelu e o.

4). O le a se lagona na oo ia Farao ona o le mea ua tupu?

Tali: Ua fefe ma atuatuva.

5). Na mafua i se a ona faigofie ona avatu e tagata Aikupito ia mea na mananao i ai Isaraelu e o mai i latou?

Tali: Ua faatupuina e le Alii le alofa o Aikupito i le nuu.

**PESE:**Saoloto, saoloto, saoloto, Lenei ua ou saoloto

Sa ou saisaitia, Lenei ua ou saoloto, Saoloto, saoloto, saoloto.

## A’OA’OGA:

1. O le Atua e maua ai le saolotoga.

2. Aua le tofotofo i le finagalo o le Atua.

3. E au le Atua ma ona tagata

## TATALO:

Faafetai i lou alofa faamaoni lo matou Atua, ia i matou, ua matou aulia fiafia mai ai lenei Aso Sa. Faamagalo o matou sēsē, ma faasino i matou ia matou iloa tino lo matou saolotoga i lau Afio. Amene.

.....

**ASO SA:** 8 MATI 2015

**MATAUPU:** UA VIVII HANA I LE ATUA

**SINI:** Ia a'oa'o le vasega ia malamalama ua vivii Hana i le Atua, ina ua tali mai i lana tatalo.

**TUSI FAITAU:** 1 Samuelu 2: 1 – 10

**FESOASOANI MO FAIAOGA:**

E i ai le mafuaaga na vivii ai Hana ma tatalo i le Atua. Manatua foi, o Hana sa lei fanau, ma sa avea lea mea o se avega mamafa ia te ia, talu ai le tau faalili ma le faaonono o Penina le isi ava a Elekana ona o lona le fanau.

O le mafuaaga lena o le tatalo faatauanau o Hana i le Atua, ina ia foai mai se tama mo ia. Na faafogaina le tatalo a Hana, o lea na fanau ai e ia le tama o Samuelu. Lea la ua vivii Hana i le Atua e ala i lana tatalo, auā ua tali le Atua i lona manao ma ua suia ai le tulaga mauualalo sa i ai o ia ina ua faamaualugaina lona nifo. O le tatalo ua fa'aalia ai lona olioli i le Alii ma ia tautino ai foi le paia o le Alii e leai se tasi e tutusa ma ia. O lē e suia tulaga o mea, e faatamaoaiiga le tagata mativa, e fasioti ma faaola, e faamaualalo ma faamaualuga le tagata.

O le tagata na malosia e gauia lana aufana a o e ua tautevateva e faamalosi i latou. O le na pa ua iu ina fanau mai se toafitu, a o ia ua toatele ana fanau, ua vaivai o ia. O le vii a Hana e faafetai ai i le Atua ina ua faaeaina o ia. Sa leai sana fanau, peita'i ina ua uma ona tali mai le Atua i lona mana'o e ala iā Samuelu, mulimuli ane ua ia toe fanau mai isi atalii e toafitu.

**Uiga o Upu:**

- i). tagata lautele - tagata mativa
- ii). tautevateva - savali toetoe a pau faatatau i tagata vaivai.

**GALUEGA FAATINO:**

1. Tusi sau tatalo faafetai i le Atua, ona o se mea lelei e te talitonu ua faia e le Atua mo oe (eg: o se iuga manuia o au suega).

**PESE:** 370 (Lou Alii ua faafetai)

**A'OA'OGA:**

1. Ia vivii ma faafetai i le Atua i mea ua foa'i mai
2. E tali le Atua i o tatou manao.

**TATALO:**

Faafetai agalelei Tamā, ua alafa'i lou atunuu, ma matou uma le fanau i le manuia ona o lau tausiga. Faamagalo lo matou sesē so'o i ou luma. Faamalosi mai matou ia matou iloa ona vivi'i iā oe, auā o lou lava alofa e le uma mo matou. Amene.

.....

**ASO SA:** 15 MATI 2015

**MATAUPU:** O LE VAVEGA NA FAIA I PETESA

**SINI:** Ia a'oa'o le vasega ia malamalama i le vavega na faia e Iesu i Petesa.

**TUSI FAITAU:** Ioane 5: 1 – 9

**FESOASOANI MO FAIAOGA:**

O le taelega i Petesa, sa tumutumu i ai tagata mama'i. O ē tauaso, o tagata pipili, ma e ma'i tino vale, e nonofo ai i lea nofoaga. E i ai le aso e alu ifo ai le agelu e gaepu le vai, o le tagata ma'i e muamua ifo i le vai, e malōlō ma te'a ai lona ma'i. Sa i ai i lena toatele o tagata mama'i se tagata ua tolusefulu valu tausaga o taoto i lona ma'i.



Na vaai atu Iesu i lenei tagata ma Ia iloa ai ua leva ona maua o ia i le ma'i ua taoto ai. Sa fesili i ai Iesu, pe fia malōlō. O lana tali, ua iloa ai, ua leva ona fia malōlō ae peita'i e i ai le mea e faigata ai. Fai mai a ia “Le Alii e, e leai lava se tagata na te tuuina ifo a'u i le taelega, pe a gaepu le vai, a alu ifo a'u e muamua ifo le tasi ia te a'u.”

Talofa e, ua leva ona feagai lenei tagata ma'i ma lona faafitauli, e fia oo i le taelega ina ia malōlō ai, ae leai se isi e fesoasoani ia te ia. Ua fetalai atu Iesu ia te ia, “Ina tu ia i luga ave lou moega, ma ia e savali.” O le taimi lava lea na malōlō ai lona ma'i, ua savali ma ave lona moega. E le'i malōlō le tagata lea ona o le taelega ae o le fetalaiga a Iesu.

#### **Uiga o Upu:**

i). Petesa - vaitaele (a pool)

**GALUEGA FAATINO:** Ia fai se faatinoga o le tala.

- PESE:**
- 1) E lelei le Atua, x 3  
E lelei o Ia ia te au.
  - 2) Na ia, ave au agasala (x 3)  
E lelei o Ia ia te au
  - 3) Lenei ua ou saoloto (x 3)  
E lelei o Ia ia te au.

#### **A'OA'OGA:**

1. Ua faamalōlōina e Iesu le na ma'i i tausaga e 38 i le taelega i Petesa.
2. O Iesu le foma'i sili.
3. Fesoasoani i tagata mama'i.

#### **TATALO:**

Faafetai i lou alofa le Atua ua matou maua ai pea le ola ma le malosi i aso uma. Faamagalalo lo matou ola sese i ou luma. A'oa'o mai inaiā matou iloa, o oe lava matou te malōlō moni ai. Amene.

**ASO SA: 22 MATI 2015**

**MATAUPU: UA LAVEA'I E IESU LE FAFINE MULILUA**

**SINI:** Ia a'oa'o le vasega ia malamalama ua lavea'i e Iesu le fafine mulilua semanu e oo i ai le oti.

**TUSI FAITAU:** Ioane 8: 3 – 11

#### **FESOASOANI MO FAIAOGA:**

O le au faresaio ma le au tusiupu, o i latou ia sa tete'e tele ia Iesu ma ana a'oa'oga. E iai le tulafono a Mose e faatatau i le tagata ae mulilua. A maua se tasi o mulilua, e oti lea tagata. E fetogia o ia i maa. Ua maua e le au faresaio ma le au tusiupu le tasi fafine o mulilua. Ua latou taitai mai ia Iesu sei o latou iloa, po o le a se finagalo o Iesu e uiga i le fafine. O lo latou naunautaiga, e saili pea se mea e ono faaleaga ai ia Iesu ma lana a'oa'oga. Sa latou tau atu ia Iesu le tulafono a Mose e uiga i le tagata e maua o mulilua.

Na punou ifo Iesu ma tusi lona tamatama'i lima i le elele ae o lo o fa'auau pea ona fesiligia o ia e le au faresaio ma le au tusiupu, po o le a se mea e finagalo i ai, e tatau ona faia i le fafine mulilua. Na faateia i latou ina ua ea ae Iesu ma tali atu “O so outou e leai sana agasala, ia lua'i togi se maa ia te ia.” Ua toe punou Iesu ma tusi i le elele. O le fia tofotofa o nei tagata ma o latou lagona faamaualuluga na omai ma i latou ua faafuasei ona suia, ona o le tali a Iesu. Ua latou manatu ifo, e leai se tasi e tonu ma sa'o, e agasala uma i latou. O le mafuaaga lea o le taitoatasi ma o ese ae tuua ai na o le fafine ma Iesu. Ua lavea'iina le fafine ma ua faasaoina lona ola semanu e oo i ai le oti ona o le tali a Iesu na tuuina i tagata ua molia maia o ia. O le fetalaiga a Iesu i le tinā “Ou te le faasala foi ia te oe, alu ia oe 'aua e te toe agasala.”

**Uiga o Upu ma Fuaitau:**

- i). tusi lona lima i le eleele - ua tu'u e Iesu le avanoa, i ē na molia maia le fafine, e faia ai la latou faai'uga.

### **GALUEGA FAATINO:**

Tali mai Fesili:

- 1) O ai tagata taulamalama ia o lo o taumafai e faaleaga le galuega a Iesu?

Tali: O le au tusiupu ma le au faresaio.

- 2) Na faapefea ona fa'aali le tete'e ma le tofotofo o le au tusiupu ma le au faresaio ia Iesu?

Tali: Ua latou aumai le fafine na maua o mulilua ia Iesu, sei o latou iloa ai po o le a se manatu o Iesu i ai.

- 3) O le a le iuga o le tagata mulilua e tusa ma le tulafono a Mose?

Tali: A maua se tagata o mulilua e fetogi i maa ia oti ai.

- 4) O le a se tali a Iesu i le mataupu a le au tusiupu ma faresaio?

Tali: "O so outou, e leai sana agasala, ia lua'i togi se maa ia te ia."

- 5) Aisea na taitasi ai ma o i latou ua molia atu le fafine mulilua, ina ua tali atu Iesu?

Tali: Auā ua latou lagona, e agasala uma lava i latou.

**PESE:** Aapa atu ma faaola, I se agaga ua leiloa  
Aapa atu ma faaola, I se agaga ua leiloa  
Aapa atu ma faaola, I se agaga ua leiloa  
Taitai mai i le faaolataga, O se agaga ua leiloa

### **A'OA'OGA:**

1. Ua lavea'i e Iesu le fafine mulilua.
2. Aua le ola taulamalama.
3. Ia salamō mai i agasala.

### **TATALO:**

Tumau atu pea le viiga ma le faafetai i la afio le Atua le Tamā, auā ua e faia pea le alofa mo i matou. Faamagalolo matou le atoatoa i ou luma. Tausi mai i lou alofa mo i matou e le aunoa, ina ia matou ola. Amene.

.....

**ASO SA :** 29 MATI 2015

**MATAUPU:** UA AFIO MAI LE TUPU  
(ASO SA LAUPAMA)

**SINI:** Ia a'oa'o le vasega ia malamalama i le malaga faatupu a Iesu.

**TUSI FAITAU:** Mataio 21: 1 – 11

### **FESOASOANI MO FAIAOGA:**

O le malaga faatupu a Iesu, e tele lona eseese ma malaga a nisi o tupu e pei ona masani ai. Ua sauni Iesu e ulufale i Ierusalem. Ua ia auina atu ona so'o e toalua i le aai o lo o lumanai, ina ia aumai le asini, e malaga atu ai i Ierusalem. O se tasi leni o valoaga o lo o taua e le perofeta o Sakaria (9: 9). "Ia outou fai atu i le tama fafine a Siona faauta, o lo o afio mai ia te oe lou tupu, ua agamalu o ia, o lo o tietie i le asini, o le tamai asini foi."

O le malaga faatupu la a Iesu, ua taunuu ai le valoaga leni a Sakaria. E mafai ona faailoa mai i le asini le ituaiga tagata o lo o tietie ai. O le asini o se manu e filemu, e faapea foi ia Iesu, o se tupu e loto maualalo ma agamalu.

O malaga foi a tupu e masani ai, e i ai fitafita e muamua i luma ma isi foi e pito i tua latou te faafeaoina, peita'i ua na o le motu o tagata o lo

o alalaga ma fola lau o laau ma o latou ofu i le ala, a o afio atu le Alii. Fai mai la latou alaga “Osana i le alo o Tavita, ia manuia le afio mai i le suafa o le Alii. Osana i mea aupito i luga.”

**Uiga o Upu:**

i). Osana - Ia e faaola mai.

**GALUEGA FAATINO:**

1. Fai se faatinoga o le tala.

**PESE:** Osana, pepese, tamaiti uma  
Tamaiti uma, tamaiti uma  
Osana pepese, tamaiti uma  
Ua afio mai le tupu.

**A’OA’OGA:**

1. O Iesu le tupu ua afio mai.
2. Ia loto maualalo e faaeaina ai.
3. Ia fa’aaloalo ma amanaia isi tagata.

**TATALO:**

Ia i lau afio pea le viiga ma le faafetai e le aunoa. Faafetai i lou alofa ma lou onosaia o i matou. Faamagalalo lo matou leaga, ma foa’i mai lou Agaga, ina ia matou iloa tino lou alofa. Amene.

.....

**MANATU TAIALA O APERILA: IA MANATUA LE ATUA I Ā TATOU FUAFUAGA FAI**

Tele taimi tatou te faia ai faaiuga le talafeagai, ma oo ai ina fememeai ma le mautonu lo tatou ola. Aua lava nei galo le Atua, saili i le Atua, e maua ai le tali lelei.

**ASO SA: 5 APERILA 2015  
(ASO SA TOETU)**

**MATAUPU: O LE OLA I TALA ATU O LE OTI**

**SINI:** Ia a’oa’oina tamaiti ia malamalama, o le toe tu mai o Iesu, o lona manumalo lava lea i le oti, faatasi ma i tatou, pe a faatuatua ma le faamaoni ia te ia.

**TUSI FAITAU:** Mareko 16: 1 – 8

**FESOASOANI MO FAIAOGA:**

**“Ua toe tu o Ia”**

O le ola i tala atu o le oti. O le agai atu o Maria le Makatala, Maria le tinā o Iakopo ma Salome e asi le tuugamau o Iesu, o lo’o aumai ai ni vaega se fa, e faamautuina ai le toe tu mai o Keriso.

- (1) **Muamua, o le vaveao.** O le faailoga lea o le aso fou. O le ufitia ai o le lalolagi i le pogisa o le po. O lo o aumai ai le ata o le faanoanoa. Le faatuatua o le Kerisiano ua amata ona mou atu, ina ua mate le lamepa sa fai ma sulu i lona ola. O le tafa o ata i le vaveao, o le oo mai lea o le aso fou, le ola fou, ma le faamoemoe fou.
- (2) **Lua, o le fuli’eseina o le ma’a.** O le agai atu o nai tinā i le tuugamau, sa latou tu’u fesili ai, po’o ai na te fuli’eseina le maa

mai le gutu o le tuugamau. Ua faateia ina ua vaavaai atu, ua leai se maa mai le gutu o le tuugamau. Ua latou ulufale, ma iloa ai ua leai se tino o Keriso. “*Ua toetu o Ia*” Upu a le agelu ua aumai ai le tala faafiafia loto i le Kerisiano.

- (3) **Ina tau atu.** Le faatonuga a le agelu, na faatonuina ai tinā nei, ina ia o atu, ma ta’u atu le Tala Lelei o le faaolataga ua faia e Iesu. Le Tala Lelei e ao ona tau atu i le lalolagi atoa, ua suia le oti i le ola fou.
- (4) **O le ofo tele.** O le Tala Lelei o le toe tu mai o Iesu, na ofo tele ai nei tinā. O le manatu Faafeagaiga Tuai, o le oti o le gataaga lea o mea, ma e leai lava se tagata e mafai ona sao mai le oti. O Iesu lava ia na fetalai, “*O au nei o le toe tu ma le ola, o se faatuatua mai ia te a’u, e ui ina oti, ae ola pea.*”

#### **GALUEGA FAATINO:**

Faatino e le vasega le tala o le Toetu (Mareko 16: 1 – 9)

**PESE:** 225 (Fuaiupu 1 ma le tali)

#### **A’OA’OGA:**

1. O Iesu e maua ai le ola fou.
2. E alofa Iesu ia te oe.

#### **TATALO:**

Faafetai i lou alofa ua matou aulia mai ai lenei aso fou; ae maise lou toetu manumalo mai le oti, ua avea ma taeao fou i le matou faatuatua papau. Faamgalo lo matou lē au talitonu ia oe. Fesoasoani mai i lo matou vaivai. Amene.

.....

**ASO SA:** 12 APERILA 2015

**MATAUPU:** SE’I TATOU SU’ESU’E I O TATOU ALA MA FILIFILI

**SINI:** Ia a’oa’oina le fanau ina ia iloa ma filifili le lelei mai le leaga. Ia malamalama foi e tumau le alofa o le Atua.

**TUSI FAITAU:** Auega 3: 34 - 41

#### **FESOASOANI MO FAIAOGA:**

##### **Faamatala le Tusi o Auega:**

O le tusi o Auega na tusia e le Perofeta o Ieremia. O le isi uiga o le upu o auega, o le tagi. O le tagi o se tagata e mafua ai ona manatu nisi, e i ai se mea ua tupu. E faapena foi ia te i tatou tamaiti. (Fesili i tamaiti) o le a se mafuaaga e mafua ai ona tatou fetagisi. O le oti foi o se tagata e pele ia te i tatou e mafua ai ona faanoanoa ma tagi le tagata. “O le tusi o loimata” o le isi lea igoa e faaigoaina ai le tusi lenei o Auega.

O le tagi o le perofeta o Ieremia i le Atua, o le faailoga o le mafatia o lona loto, ina ua faatafunaina (faaleaga) le nuu o Isaraelu. Ua tagi le perofeta ona o le alofa i lona nuu ma ona tagata. Ae o le mafuaaga tonu lava na mafua ai ona tutulu (tagi) le perofeta, ina ua filifili e le nuu le leaga. Ua tatalo le perofeta i le Atua ma loimata, sei toe faaola i lona nuu. Ua filifili e Ieremia le Atua, na te toe aumaia le lelei mo lona nuu. E lei tagi Ieremia ona e tagivale (O le isi lea igoa o Ieremia/ “o le perofeta tagivale”) ae ua tagi ona o le alofa moni. Ua talia e le Atua le tatalo a le perofeta. Le tagata ua muamua ona filifili i le alofa tunoa o le Atua. “Ona oo mai ai lea o le faaolataga ia Siona (Isaraelu).”

## **GALUEGA FAATINO:**

Tusiga Tala:

- Tusi se tala pu'upu'u e faamatala ai se mea na mafua ai ona tagi. Se tala faanoanoa, po o se tala fiafia foi. (Faamanatu i tamaiti, e mafua foi ona tagi le tagata ona o le fiafia)
- 5 minute e faatino ai lea galuega.
- Ao tala a tamaiti ma togi.

**PESE:** 134 “Ou te tagi i lou Tama e”  
(Fuaiupu muamua ma le tali)

## **A’OA’OGA:**

1. Ia muamua ona filifili le alofa o le Atua i mea o le lalolagi nei.
2. O le Atua na te toe aumaia le leleiga.

## **TATALO:**

Faafetai ua matou aulia manuia mai lenei Aso Sa i lou alofa le Atua. Faamagalo matou, ma a’oa’o mai ina ia matou iloa ona ola mama i ou luma. Amene.

.....

**ASO SA:** 19 APERILA 2015

**MATAUPU:** SE A FOI SE MEA TOU TE LOTO I AI?

**SINI:** Ia a’oa’o tamaiti ina ia ‘aua le avea le fefe e fai ma auala e fai ai le faaiuga sesē.

**TUSI FAITAU:** Mareko 15: 1 – 15

## **FESOASOANI MO FAIAOGA:**

E faamasinoina le tagata ina ua ia faatinoina le leaga, ua ia faia se mea sesē. Ma o le tagata foi na te faia le faamasinoga, e fua lana faaiuga i molimau. A o faaiuga ia ‘aua nei faia ma le fefe, po o le manao ina ia maua le tau leleia. O faaiuga ia fai ma le amiotonu.

“Se a foi se mea leaga ua na faia?” Le fesili na fesiligia ai le motu o tagata Iutaia e Pilato, ina ua latou molia Iesu i le faamasinoga. E lei tali le motu o tagata i ni moliaga faasaga i le Faaola, ae ua tali i le mea ua mananao ai o latou loto. O le tala lenei i le faamasinoina o Iesu, o lo’o aumai ai se ata matautia o ni faaiuga ua mafua ona fai, ona o le manao o le tagata. Na iloa lelei e Pilato le mafuaaga ua mananao ai le au ositaulaga sili, toeiaina ma le au tusiupu, ina ia faamasinoina Iesu. O loto ua leaga. Ua popole nei faoa lo latou mamalu ma le tamaoaiga, ma e leai foi se tulafono ua soli e Iesu.

O Parapa, o le tagata fouvale i le malo o Roma, o le tagata fasioti tagata, faatupu faalavelave, ma o le mafuaaga lea na ave ai i le falepuipui. O tu ma aga faa-Iutaia, a oo i le tausamiga o le paseka i tausaga taitasi, ona faasaoloto lea o se pagota. Lea ua alalaga ai Iutaia ina ia tatala Parapa ae faasala Iesu. Le alalaga leo tetele lea o le motu o tagata, na fememea’i ai, ma lē mautonu ai Pilato, ma oo ai ina popole ma ia faia ai le faaiuga sesē. “Se a foi se mea tou te loto i ai...?” Ina faasatauro ia te ia.” Ua loto Pilato e faamalie i le motu o tagata.

## **GALUEGA FAATINO:**

Manuia pe a fai sina faatinoga pu’upu’u

Taliga Fesili:-

1. Aiseā na mananao ai le au ositaulaga ma le au tusiupu e faasatauro Iesu?

Tali: O loto ua leaga.

2. O ai na faaosoina le motu o tagata?  
Tali: Au faresaio ma le au tusiupu.
3. O se faaiuga amiotonu na faia e Pilato?  
Tali: Leai
4. O ai Parapa?  
Tali: Pagota, tagata fouvale.
5. E alagatatau ona faasatauroina Iesu?  
Tali: Leai.
6. Aisea?  
Tali: Ona e leai sana agasala.

**A’OA’OGA:**

1. ‘Aua le fefe e ta’u le mea sao.
2. O le Atua e maua ai le faaiuga tonu.
3. ‘Aua nei faia se faai’uga ona o le manao sesē o nisi tagata.

**TATALO:**

Faafetai i lou alofa tumau mai mo i matou i aso uma. Faamagalalo mai o matou sesē. Faatonu mai i lou Agaga, ina ia matou iloa ona tautatala i le mea sa’o, ma ‘aua le fefe i le mea moni. Amene.

.....

**ASO SA: 26 APERILA 2015**

**MATAUPU: O LE TULAFONO PO O KERISO?**

**SINI:** A’oa’o tamaiti ina ia latou iloa, e fesoasoani le tulafono e faatonutonu ai le tagata i le lelei, a e afai lava o lou tagata o soifua ma ola iā Keriso le Alii, e leai la se uiga o ni tulafono, auā o le Alii o Iesu Keriso, o le lelei atoatoa lava lea.

**TUSI FAITAU:** 1 Korinito 7:17 – 20

O le uluai tusi leni a le Aposetolo o Paulo i le Ekalesia i Korinito; o lo o faamanino ai le tele o mataupu o fenumaia’i ai le Ekalesia, ma sei tali ai le anoano o fesili i mea e uiga i le lotoifale faa-Kerisiano e pei o faaiipoipoga, nofotoatasi, meaaai mo tupua, meaalofa faa-le-agaga ma isi e tele. Foliga mai ua i ai ni suiga tetele ua manatu tagata e fai, e aunoa ma lo latou mafaufau i ni fevaevaeai e ono tutupu mai ai. O le mataupu 7 – 16, o tali a Paulo i mea eseese ia o fesiligia e Korinito. Ma o le manatu o le aposetolo i le vaega tonu o le tusi faitau o agai i ai le mataupu o le asō; “E tatau i tagata taitoatasi ona avea ma Kerisiano, i so o se mea lava o e i ai.” O le faatonuga lea a Paulo o fai i Ekalesia uma lava (f.17). O le uiga o le manatu o Paulo – E mafai ona e faia galuega a le Atua ma fa’aali mai lou faatuatua i so o se mea o e i ai.

Faataitaiga (eg) – Afai o oe o le Kerisiano ua uma ona e faaiipoipo, ae o lou toalua e lē o se tagata e talitonu i le Alii, - ‘Aua e te manatu ua e i ai i se tulaga sesē, po ua saisaitia oe ona ua sesē le tagata ua e mafuta i ai. Leai, e mafai lava ona avea oe ma tagata sa’o, (tagata o le Alii) po o fea lava e moomia ai oe e le Atua (7: 20). Manatua, e mafai ona avea lou toalua ma Kerisiano e talia le Alii, e ala i lau galuega e fai. Ona aumai lea e Paulo le mataupu i le peritome e faamanino atili ai lona manatu (f.18-19). O le peritome, o se vaega taua o le ola feso’otai atu o le Iutaia i lona Atua, e pei ona faatulafonoina i le Feagaiga Tuai. O le peritome sa faatonu mai e le Atua mo i latou uma

e mulimuli ia te Ia, (Kenese 17: 9 – 14). Peita’i, ina ua mavae le maliu ma le toetu o Iesu, ona lē toe i ai lea o se afaina o le lē peritome. (Galuega 15; Roma 4: 9 – 11; Kalatia 5: 2 – 4, Kolose 2: 11). O le usiusita’i ma le faia o le mea e malie ai le finagalo o le Atua, “O le faatuatua lena iā Iesu Keriso.” Po o le fea lava la tulaga e uia e le tagata, o le mea sili ona taua, o lo tatou tausia lea o poloaiga a le Atua, e ala i le faatuatua iā Iesu.

### **GALUEGA FAATINO:**

1. Tusi mai, pe faamatala mai i se parakalafa pu’upu’u se tasi, sau lava faataitaiga o le autu o le mataupu o lenei Aso Sa.

(eg) TULAFONO A LE AOGA: - “E amata le aoga i le 8.00 i le taeao (am) a’e tuua i le 2.00 i le aoauli (pm), o aso uma. E tasi loa lau tuai, e malōlō i le vaiaso atoa.”

Sainia e le Pule Aoga

\* E tāua le tulafono, e faamalosia ai ma unaia ai tamaiti mo lo latou lelei. Ae leai se uiga o le tulafono; pe a faamaoni ma naunau moni le loto i le fia maua o le potu.

2. Fetufaai lau susuga ma le vasega i ni fesili ma tali.

**PESE:** 177

### **A’OA’OGA:**

1. E sili le loto faamaoni ia Keriso.
2. E taua tulafono.
3. ‘Aua le ola faafoliga.

### **TATALO:**

Faafetai tele le Atua i lou alofa, ua matou maua ai lenei Aso Sa i le manuia. Matou te faatoese atu ona o lo matou leaga ma le sesē pea e le aunoa i ou luma. A’oa’o mai lou Agaga ina ia matou iloa atili pea, o le faatuatua ia Iesu Keriso, e sili lea nai lo le mulimuli i ni tulafono se tele. Amene.

.....

### **MANATU TAIALA O ME: O LE ATUA E MANATU MAI**

O le soifuaga o tatou i ai nei, e le lautasi lava taiga o le ola i aso uma. O le aso ua malū, o le aso foi ua le to’amalie. Ae ona o le natura faale-tagata, e loto i le solo lelei ma le faafifilemu i taimi uma; O le ala lena e manatu ai le tagata, ua le auai mai le Atua ia te ia, pe a fetai ai ma faigata o le ola. Peita’i, o le Atua e i ai pea ma manatu mai i lana tagata na fai, i aso uma o lona ola.

**ASO SA: 3 ME 2015**

**MATAUPU: FA’AALI LE ATUA IĀ PALAAMO**

**SINI:** Ia a’oa’o le vasega ina ia malamalama i ala sa fa’aali ai le Atua ia Palaamo, o le Atua auai lava lena iā ia, mo sona lelei.

**TUSI FAITAU:** Numera 22: 2 – 33 (mo le Faiaoga)  
Numera 22: 10 – 33 (mo le Vasega)

## FESOASOANI MO FAIAOGA:

**Aotelega o le tala:** O le tupu o Moapi o Palako lona igoa, sa faalogo i tala ofoofogia o Isaraelu i lalo o le pule a lo latou Atua, ona fefe ai lea faatasi ma ona tagata. O le agai mai la o Isaraelu mai Aikupito i Kanana lona laueleele sa folafola iai e le Atua. O le tupu tele foi lena o le fefe o le tupu o Palako ia Isaraelu, sa ia feauina ai loa Palaamo le tagata vavalō, (sorcerer – tagata e faamanuia ma fetu’u i tagata) e sau e fetu’u Isaraelu, ona tu’uina atu lea mo ia le tau’i e tele, ma le mamalu. O Palaamo na te iloa le Atua ma lona malosī na te mafaia ai so o se mea e finagalo ai, a’e ua na ona iloa ma le faamoemoe e maua ai sona tamaoaiga, a’e le faatuatua ia te Ia. O le ala lena o le usita’i muamua o Palaamo i le Atua sa saili i ai, i le ulua’i savali a Palako na alu atu. Foliga o lona usita’i i le Atua, o se auala na te sufi ai le alofa o le Atua, ia faamanuia atu ia te ia, ia sili atu i lo lē o folafola mai e Palako.

O le faalua mai la o le savali, ua sili atu le tau’i ma le mamalu ua folafola mai e Palako mo Palaamo, sa tosina i ai lona loto, o le mafuaaga lena o lona taofia o le savali, ae sei toe alu e fesili i le Atua. Ae manatua, ua uma ona fetalai iai le Atua; “‘Aua e te alu! ‘Aua foi e te fetu’u i le nuu ua faamanuiaina!’” Na fetalai iai le Atua iā Palaamo e alu, a e tau lava o le mea e fetalai atu ai na te faia. Ona alu ai lea, a e fetalai ai loa ma nisi foi mea matautia e pei ona lē mafai ai e lana asini ona alu, ma ia sasa faatolu ai. Peita’i, o le agelu lava a le Atua na mulia’i ona iloa, a’e sa muai faagaganaina le asini e fai ma faailo iā ia o le mea ua tupu. Ua tautino atu e le agelu ia Palaamo, ana ia te ia se naifi, semanū ua oti ae sao le asini. O iina na pupula ai ona mata, ma ia tautino ai i le Atua lona tagata agasala. Sa faatonu e le agelu Palaamo e o’pea ma tagata, ae faalogo i le Atua i upu e tautala ai.

## Uiga o Upu ma Fuaitau:

- i). (f.22) toasa - finagalo le fiafia o le Atua/ita/toatamai.
- ii). (f.24) va apiapi - va iti
- tovine - togāvine

- aupa - pa
- iii). (f.25) omia - utia/a’afia
- iv). (f.28) faagaganaina- faatautala
- v). (f.29) faaonoono - faaita/faatigā loto
- “se anoa ana i lou lima - Ana i ai se pelu i lou lima.

## GALUEGA FAATINO:

Filifili le tali sa’o ona tusi lea o le mataitusi o le tali sa’o.

**\*Fautuaga:** (Matuā faitau māeaea lelei, ona o le tele o tali e tai tutusa lava, ae o iinā e iloa ai lou malamalama lelei i le tala. Fa’aaogā lau Tusi Paia)

1. O lo o iloa i le tali a Palaamo i le f.18, o ia o se tagata e,
  - (a) Fa’aaloalo tele i auauna a Palako.
  - (e) O le fia fai auro ma ni ario.
  - (i) Usiusita’i tele i poloaiga a le Atua.
  - (o) Pe tele, pe itiiti, e fiafia lava ia so’o se mea.Tali: (i)
2. A e faitau i le (f.12), ona e toe faitau lea i le (f.19). O iinā e te iloa ai, o Palaamo, o le tagata....
  - (a) palaai
  - (e) fia fai tupe
  - (i) fia poto
  - (o) tau faavaleaTali: (e)
3. O le (f. 20) o lo o fetalai ai le Atua iā Palaamo e alu, ae aisea na toe toasa (to’atamai, lē malie) ai le Atua e pei ona ta’ua i le f. 22?
  - (a) Ona o le Atua, o le Atua fuā.
  - (e) Ona o Palaamo, o le tagata usiusita’i i le Atua.
  - (i) Ona o Palaamo, o le tagata manao tele ma lē usita’i i le Atua.



(o) Ona o Palaamo, o le tagata le kea i le Atua.  
Tali: (i)

4. O le faagaganaina o le asini, ma lona taoto ifo i lalo, ua lē alu i luma ona o le agelu o i ona luma, o le tete'e atu lava lea i le manaoga leaga o iā Palaamo. O lea mea, o le

(a) faafiufiu lava lea o le asini ia Palaamo.  
(e) fai togafiti poto lava lea o le asini ona o lona augata.  
(i) inoino lava lea o le asini ia Palaamo.  
(o) o le lavea'iina lava lea o Palaamo.  
Tali: (o)

5. E fasioti moi lava e le agelu Palaamo, pe ana

(a) le salamō i lona leaga.  
(e) u'u e le agelu se pelu.  
(i) le fefe le agelu iā Palaamo  
(o) ita tele le agelu.  
Tali: (e)

**PESE:** Laulau mai pea ia te i matou (371)

#### **A'OA'OGA:**

1. E lelei le faamaoni i le Atua.
2. E leaga le naunau i le oa.
3. E aogā le asini.

#### **TATALO:**

Faafetai alofa mai ia i matou uma lava lau fanau, a'oa'o mai ina ia matou iloa ona usiusita'i ma faia lou finagalo, faamagalo lo matou mana'o tele, e oo ai i matou i le malaia. Amene.

.....

**ASO SA:** **10 ME 2015**  
**(ASO SA O TINĀ)**

**MATAUPU:** **APOAPOAIGA A LE TINĀ ALOFA MONI.**

**SINI:** Ia a'oa'o tamaiti ina ia malamalama, e iloa le moni o le alofa o se tinā i lana tama, i ana upu e apoapoa'i ma faatonu ai.

**TUSI FAITAU:** Faataoto 31: 1 – 9

#### **FESOASOANI MO FAIAOGA:**

O vaega tonu o le tusi o Faataoto sa tatou faitauina, o lo o atagia mai ai le alofa moni, ma le naunau o le loto o le tinā o le tupu o Lemueli, ina ia manuia ma tauleleia le nofoaiga a lana tama. O ana apoapoaiga o tusia iinei, o se taiala lelei, ua le gata ina fai ma faamanatu tatau ma taiala aogā, mo tama tane uma e ono avea ma tupu, po o se taitai foi mo se vaega tele o tagata, ae o se mamanu lelei foi i le ola fautua o tinā. O upu uma o aumai ai le fautuaga ma timaiga a le tinā mo Lemueli lana tama, o lo o iloa ai lona alofa faapelepele i le tama na ia fanaua i lona manava.

(i) **Fafine (f.3)** - O le vavao e faasino i le itupa o fafine, o le agaga ia faamaoni le tupu o Lemueli i lana avā o la faatasi, ma fai ma masiofo o le malo. Ia aloalo 'ese i fafine, ona o le faafitauli i mea tau fafine, ua tele ina paū ma maumau ai nofoaiga a tupu.

(ii) **'Ava malosi (f. 4-7)** - O le fautuaga i le ava malosi i le manatu o le tinā; ona e le tatau, ma e le onomea foi ona tagofia e se tupu, ae maise i taimi o ana faaiuga fai. Auā o le ava malosi, e ono sēsē ai ana faaiuga fai, pe afai e onā; a'e maise lava nai tagata matitiva, ina nei avea iuga fai ae le sa'o, ma ala e saga faavaivaia ai, ma taotaomia ai pea tagata matitiva. E i ai lava le

taua o le uaina po o le 'ava malosi, a'e faapitoa i taimi o lagona le loto mafatia, ma le galala; auā e aogā e fai ma fesoasoani.

- (iv) **Faaiuga tonu (f. 8-9)** - O le tupu, o ia e tulai ma saunoa i le mea moni, pe a molia mai ma faamasinoina nai tagata matutua, mafatia ma mama'i. O tagata nei, e maulalo le tamaoaiga, toe lē taualoa i le sosaiete, e tele ina leai se avanoa e fa'aali ai o latou lagona pe a faamasinoina; ma e tele lava ina lē amiotonu faaiuga e fai ia latou. Ae o le tupu la, o lana upu e usita'ia ma fa'aaloogia e tagata uma, e faamoemoe i ai le lavea'iina o tagata nei.

#### Uiga o Upu ma Fuaitau:

- i). (f. 1) valoaga - valoia/o le iloa lea i le taimi nei o se mea, o le a tupu i le lumanai.  
ii). (f. 3) fano - uma/faaletonu/malaia.  
iii). (f. 4) "e le ono" - e lē lelei/e lē fetau/e lē talafeagai.  
iv). (f. 6) mole - fia inu/galala  
v). (f.8) – au matuā - tagata ua matuā matua lava le soifua/tele ona tausaga o soifua ai.

#### GALUEGA FAATINO:

- A. Taligā Fesili: Tusi mai le mataitusi, o le tali e aupito sili ona sa'o e tusa o le tala.(Fa'aaoga lau Tusi Paia) O le tali sa'o o lo o maka atu \*)
1. O le faamoemoe autu o le valoaga o i le Faataoto 31: 1 – 9 ia,
- (i) 'aia nei tauvlea le tupu.
  - (ii) 'aia nei toe faia se toalua o le tupu.
  - (iii) 'aia le inu-ava malosi le tupu.
  - \* (iv) Ia manuia le nofoaiga a le tupu.

2. O le ava malosi e tatau

- \* (i) mo lē tigā le loto.
- (ii) mo lē ua fia inu ava malosi.
- (iii) mo le tupu e leai sona toalua.
- (iv) mo tagata lautele.

3. E le ono lava i tupu le inu uaina, ona

- (i) e onā ai le tupu.
- (ii) e sauā ai le tupu.
- \* (iii) e lē tonu ai faaiuga a le tupu.
- (iv) e gutu valea ai le tupu.

4. O mea e lua (2) e sili ona popole i ai le tinā o le tupu, ina nei aafia ai le tupu o le,

- (i) mativa & faamasinoga.
- \* (ii) ava malosi & fafine.
- (iii) fafine & tupu.
- (iv) ava malosi & tagata tigaina.

5. O le tinā o le tupu e

- (i) faamaoni.
- \* (ii) alofa.
- (ii) fiapoto.
- (iii) ote tele.

**PESE:** "Lo'u tinā ou te alofa ia te oe!" po o se pese e te silafia e lelei ma fetau.

## A’OA’OGA:

1. E alofa tinā.
2. O le faamaoni le ala sili.
3. E lelei le usita’i.

## TATALO:

Ua matou talitonu i lou alofa Tamā, ma ua le uma lo matou loto fiafia ma le faafetai ia oe. Faamagalo mai matou, i lo matou le usiusita’i i o matou tinā, o lo matou leaga lava lea i ou luma. Tausi mai matou ma faamanuia le lalolagi ma tagata uma lava. Faamalosi, faafiafia ma faafualoa le ola o nai o matou tinā. Amene.

.....

**ASO SA: 31 ME 2015**

**MATAUPU: E MAGALO AGASALA IA IESU**

**SINI:** Ia a’oa’o tamaiti ina ia malamalama, o Iesu o le Alo o le Atua, o iā te Ia le mana na te mafai ai ona faamagalo agasala a ē ua salamō ma faatuatua ia te Ia.

**TUSI FAITAU:** Mareko 2: 1 – 12

## FESOASOANI MO FAIAOGA:

(i) **O Iesu** - so o se mea e ta’ua ai Iesu, e tumutumu foi i ai tagata, e le gata e fia vaai ia te Ia, ae fia iloa foi pe moni tala i le tele o vavega ma mea ofoofogia na te faia. O lona i ai la i se tasi o fale i le aai o Kapanaumi, sa tumutumu foi ua le ofi le fale sa iai o ia i le motu o tagata.

(ii) **Ma’i Supa** – o le ma’i supa o le ma’i e aafia ai le tino o le tagata, e mafua ai ona pepe vae ma le mafai ai ona savali. O le tagata ma’i supa lea, na fata, pe na sa’esa’e mai le moega e tagata e toa fa, e ave ia Iesu le Foma’i e malōlō ai. O le tumu tele o le fale ua leai se auala e sao ai ia Iesu, na ave ai loa le ma’i supa i luga o le fale, tatala le ufi o le fale (apa) ae tu’utu’u ifo ai i lalo le tagata ma’i ia Iesu. O le lagona mafatia o le tagata ma’i lenei, sa le faigata ona iloa e tagata nei na latou saesaeina o ia, ae sa latou lagonaina foi. O le ala tonu lena o lo latou matuā saili vave ma faanatinati se ala e o’o ai o ia ia Iesu. O lo latou mautinoa foi e malōlō o ia iā Iesu, o iina foi e tau mai ai lo latou faatuatua ia te Ia.

Ua oo o ia iā Iesu, ona fetalai atu lea iai o le Alii – “Lo’u atalii e, ua faamagaloina au agasala.” O le fetalaiga lea a Iesu, ua iloa ai, o le gasegase o le sa ma’i e mafua ona o le agasala, lea ua faamagaloina nei e Iesu.

(iii) **Tusiupu** - O tusiupu, o nisi foi tagata iloga o le Lotu Iutaia, a’e latou te lē talia Iesu ma ana a’oa’oga. O le fetalai foi o Iesu i le faamagaloina o agasala lea e manatu latou na o le Atua na te mafaia, latou te le taliaina lava i o latou loto. Ae na silafia lava e Iesu ia vaivaiga i o latou loto. E ui lava i o latou loto lē māmā i le Alii, ae lei taofia ai le faamagalologa a Iesu e ala i lona faamagaloina o agasala a le sa ma’i. Lea ua malolo, ma ua latou matuā ofo ai ma tu’ufesilisili solo, ona faatoa latou vaai lea i se tagata ua na mafai ona faia se mea faapea talu mai anamua. O le Alii o Iesu, e tele lona manatu alofa i tagata, lē afaina o latou loto le māmā ia te Ia.

## Uiga o Upu ma Fuaitau:

- i). (f. 1) logo - o le tala ave, tau atu, ae lē o se logo e ta ai le lotu.
- ii). (f.3) supa - o le ma’i e pepē tino e aofia ai ma lima ma vae, e foliga i le “stroke”

- iii). (f. 4) faasosofa- tala le fa'alo o le fale/talepe le fa'alo ina ia avanoa.
- iv). (f. 7) faifai - upu vale/ faitio/ upu tau faaleaga.
- v). (f. 12) anamua - aso po o tausaga ua leva ona tea/taimi ua mavae.

**GALUEGA FAATINO:**

- 1. Tali mai i le “Sa’o” po o le “Sesē,” e iloa ai ua e malamalama lelei i le tala. (Fa’aaoga lau Tusi Paia e fai ma fesoasoani)
  - (i) “Lo’u atalii e, ua faamagaloina au agasala.” O upu a le supa.  
Tali: Sesē! O upu a Iesu
  - (ii) “Se a le mea ua tautala ai faapea lenei tagata? O le fesili, o lo’o fesili ifo ai tusiupu i o latou lava loto e uiga ia Iesu.  
Tali: Sa’o.
  - (iii) O tagata e toafa o lo o taua i le tala, o tagata faatuatua, a’e lē o ni talepe fale.  
Tali: Sao.
  - (iv) O tusiupu o taua, o uo mamae a Iesu.  
Tali: Sesē.
  - (v) O le pule e faamagaloina ai agasala a le lalolagi, o iai lea iā Iesu.  
Tali: Sa’o.
  - (vi) O le motu o tagata sa vaai i le faamalologa ma mea sa faia e Iesu, sa matuā ofo lava.  
Tali: Sa’o.

**PESE:** O Iesu o le papa na te aveese a’u agasala  
Jesus is the rock that He rolls my sins away

**A’OA’OGA:**

- 1. O Iesu o le Foma’i o agaga.
- 2. Aloaloese mai le agasala.
- 3. Ia faatuatua i le Atua.

**TATALO:**

Ia tumau pea le mamalu ma le viiga uma lava i lau Afio lo matou Atua e faavavau. Faamagaloina mai lo matou vaivai ma le sesē, ma tausi mai i matou uma lava i lou alofa i lenei vaiaso. Amene.

.....

**MANATU TAIALA O IUNI: “E PULE AOA LE ATUA”**

E tele suiga ua taumafai i ai le tagata e suia ai le natura ma le tulaga masani o le olaga. E faapena foi i lo tatou atunuu i le suiga o aso ma taimi. Ae peita’i e silisili ese lava suiga e faia e le Atua ma faailoa ai lana pule aoao i mea uma o le foafoaga.

**ASO SA: 7 IUNI 2015**

**MATAUPU: “UA FAATUMAUIA LE LA MA LE MASINA”**

**SINI:** Ia a’oa’o le vasega ia malamalama o le Atua lava na mafua ai ona tumau le la ma le masina.

**TUSI FAITAU:** Iosua 10: 12 – 15

## FESOASOANI MO FAIAOGA:

O se tasi lenei o mea ofoofogia na tupu o lo o taua i le Tusi Paia, “O le faatumauina o le la ma le masina. O le mea na tupu, na tau Isaraelu ma tupu e toalima o sa Amori. O i latou nei na au faatasi ina ia fasia le nuu o Kipeona. Ae manatua foi, o Kipeona ua uma ona faalelei ma osi feagaiga ma Isaraelu, lea na faasaoina ai i latou (9: 15 – 19)

O le mafuaaga lea o le saili fesoasoani o Kipeona ia Iosua ma le nuu o Isaraelu ona o le taua ua sauni tupu o sa Amori e sii mai ia te i latou. Ua o atu Iosua ma Isaraelu ua tau ma tupu o sa Amori ma fasia i latou i le fasi tele, aua na fetalai le Atua ia Iosua, “Aua e te fefe ia te i latou, aua ua ou tuuina atu i latou i ou lima, e leai so latou e tu i ou luma.” Na au le Alii ma lona nuu i lea aso. Sa tautala atu foi Iosua i le Alii ua faapea atu “Le la e, ia tumau oe i luga o Kipeona, ma oe le masina i luga o le vanu o Ailona.” Sa faatumauina le la i totonu o le lagi i lea aso ua le vave ona alu ifo. O le faailoga lea o le talia e le Atua o manao tagata e talitonu ia te ia. Ae le gata i lea, a ua fa’aalia ai foi le pule aoao a le Atua i mea uma lava.

### Uiga o Upu:

- i). Kipeona - o le nuu sa osi feagaiga ma Iosua ma Isaraelu ina ia faasaoina i latou.
- ii). Ailona - o le alia (vaitafe)
- iii). Iasera - o le tusitala, a ua le aofia sana tusi i le kanona. O lo o ta’ua foi i le II Samuelu 1: 18

### GALUEGA FAATINO: Tali mai i Fesili

1. O a upu a Iosua na fai atu ai i le Atua?

Tali: “Le la e, ia tumau oe i luga o Kipeona ma oe le masina i luga o le vanu o Ailona.

2. O ai i latou na tau ma Iosua ma le fanauga a Isaraelu?

Tali: O sa Amori ma o latou tupu e toalima.

3. Pe na tali le Atua i le upu na tautala atu ai Iosua?

Tali: Ioe, aua sa tumau le la i totonu o le lagi, ua le vave ona alu ifo.

4. O le faatumauina o le la e masani lava ona tupu pe a tau se taua. E sa’o pe sese?

Tali: E sese, “E leai se aso na muamua pe mulimuli e tusa ma lena ...”

5. O fea le nofoaga o lo o faamautu i ai le fanauga a Isaraelu?

Tali: O Kilikala.

**PESE:** O le Atua e tele  
E malosi ofoofogia  
E leai se mea  
E le mafai ona ia faia.

### A’OA’OGA:

- 1. E tali mai le Atua i o tatou manao.
- 2. E leai se mea e faigata i le Atua.
- 3. E pule aoao le Atua i mea uma.

### TATALO:

Faafetai ua aulia manuia mai e matou le fanau ma tagata uma lenei Aso Sa. Faamagalalo lo matou faalogogatā i ō matou matua. Tausi mai matou i lou alofa tele. Amene.

.....

**ASO SA:** 14 IUNI 2015

**MATAUPU:** UA SOPOIA E ISARAEU LE IORITANA

**SINI:** Ia a’oa’o le vasega ia malamalama o le mana o le Atua, na sopoia ai e Isaraelu le Ioritana.

**TUSI FAITAU:** Iosua 3: 14 – 17

**FESOASOANI MO FAIAOGA:**

O le Ioritana, o se vaitafe tele ma loloto, e le mafai ona tu ai se tagata. A oo ina tafe tetele le vai, e oso i tua i auvai le vai. Ua sauni Isaraelu e ulufale atu i le nuu o Kanana, ae e lē mafai, sei vagana ua sopoia le Ioritana. Ua uma foi ona faatonuina le nuu i le auala latou te mafai ai ona sopoia le Ioritana.

E muamua faitaulaga latou te ave le atolaau a le Atua, ae mulimuli atu le nuu uma. O le taimi lava e papa’i ai vae o faitaulaga i le vai o le a faapea ona vaeluaina le vaitafe. O le mea lava lea na tupu ma molimau i ai le nuu o Isaraelu. Ua vaeluaina le vaitafe ina ua fufui i le auvai o vae o faitaulaga na aveina le atolaau. Ua tu le vai e tafe ifo mai luga e pei o se mea maupuepue, o le vai na tafe ifo agai i le sami ua mate. Ua savavali le nuu i le ilitivai agai i le mea e feagai ma Ieriko. O le taimi lea o lo o tutu ai pea faitaulaga ma le atolaau a le Atua i totonu o le itiiti vai matutu, seia uma ona sopoia atu o le Ioritana e tagata uma.

**Uiga o Upu:**

i). Atama - o le igoa o le aai e latalata i Sotoma ma Komoro (Kenese 10: 19)

**GALUEGA FAATINO:** TUSIGATALA

Ia tusi sau tala e (3) tolu parakalafa, e faamatala ai se faafitauli, po o se mea faigata na tupu ia te oe, ae na mafai ona e manumalo ai. Ia faaulutala – “O LE FAAFITAULI NA OU MANUMALO AI”

**PESE:** 166 (Pese ma Viiga)

**A’OA’OGA:**

1. Ua sopoia e Isaraelu le Ioritana.
2. E au le Atua ma ona tagata faatuatua.

**TATALO:**

Faafetai mo lo matou malosi ma le ola, aemaise o meaalofa o le mafaufau ma le agaga. Faamagalalo o matou sesē, a tausi mai matou lo matou Tamā, i lenei vaiaso. Amene.

.....

**ASO SA:** 21 IUNI 2015

**MATAUPU:** UA TOE FAAOLAINA MAI LASALO

**SINI:** Ia a'oa'o le vasega ia malamalama ua toe faaolaina mai Lasalo ona o le pule a le Atua.

**TUSI FAITAU:** Ioane 11: 38 – 44

### FESOASOANI MO FAIAOGA

O le toe faaolaina mai o se tagata mai le oti, o se mea e faigata tele ona tatou talitonu i ai, auā e lē o se mea e masani ona tupu.

Peita'i, o le tatou mataupu mo lenei taeao, o lea o lo o taua ai se tasi o galuega ofoofogia, na faia e Iesu, o le toe faaolaina lea o Lasalo. O Lasalo, o le tuagane o Maria ma Mareta. O le aiga lenei e masani ona malolō i ai Iesu. E lei vave ona alu ane Iesu i le feau na logo atu ai o ia, e uiga i le ma'i o lana uo. E taunuu atu Iesu, ae faafetaia'i mai i se tala faanoanoa, ua oti Lasalo. O le manatu o tuafafine o Lasalo, ana i ai Iesu, e le oti Lasalo. Ae na tali i ai Iesu "E toe tu mai lou tuagane," (Ioane 11: 23)

Sa manatu foi nisi tagata sa i ai, afai na faapupula e Iesu mata o le tauaso, e tatau foi, ona ia vavao o le oti o Lasalo. Ua oo Iesu i le tuugamau o Lasalo, ua ia fai atu e ave ese le maa. Peita'i, na ta'u atu ia te ia e Mareta "Le Alii e, ua oo ina manogi aua o lona po fa lenei." O le tali a Iesu, na ia faamanatu ai ia Mareta, le taua o le faatuatua ma talitonu. "Pe na ou le fai atu ea ia te oe, Afai e te talitonu, ona e iloa lea o le mamalu o le Atua?"

Ina ua uma ona ave ese o le maa, ona tepa lea o fofoga o Iesu i le lagi ma faapea atu, "Lou Tamā e, ou te faafetai atu ia te oe, aua ua e faafofoga mai ia te au. Ua ou iloa foi, e te faafofoga mai ia te au, e le aunoa a e peita'i ua ou fai atu ai, ona o le motu o tagata o lo o vagavagai, ina ia talitonu i latou ua e auina mai a'u.

Ina ua uma le tatalo a Iesu, ona ia valaau lea ma le leo tele, "Lasalo e, ina sau ia i fafo." O le taimi lava lea na sau ai i fafo Lasalo, o lo o

fusifusia lona tino i fusi ma ona mata i le solosolo. Sa faatonu e Iesu, ina ia tatala ia te ia ma tuu atu e alu.

### Uiga o Upu ma Fuaiupu:

- i). manogi - elo (lē lelei)
- ii). vagavagai - tumutumu

**GALUEGA FAATINO:** Saili mai upu nei i totonu o le Paso. Faasolo i lalo ma le agai i autafa.

- |              |             |              |               |
|--------------|-------------|--------------|---------------|
| 1. aunoa     | 6. fusi     | 11. motu     | 16. tuafafine |
| 2. auina     | 7. fusifusi | 12. Lasalo   | 17. vagavagai |
| 3. faafetai  | 8. upu      | 13. mamalu   | 18. aao       |
| 4. faafofoga | 9. ma'a     | 14. talitonu | 19. fai       |
| 5. finagalo  | 10 manogi   | 15. tiga     | 20. Atu       |

|   |   |   |   |   |   |   |   |   |   |
|---|---|---|---|---|---|---|---|---|---|
| f | v | a | n | i | u | a | s | v | t |
| u | p | u | l | s | n | e | m | a | u |
| s | f | a | a | f | o | f | o | g | a |
| i | a | f | s | u | t | a | t | a | f |
| f | a | f | a | l | i | a | u | v | a |
| u | f | u | l | a | l | u | s | a | f |
| s | e | s | o | m | a | n | o | g | i |
| i | t | i | g | a | t | o | a | a | n |
| a | a | o | l | m | a | a | l | i | e |
| f | i | n | a | g | a | l | o | s | t |

**PESE:** O Iesu e Manumalo (Jesus is a winner man)

### A'OA'OGA:

1. Ua toe faaolaina e Iesu Lasalo mai le oti.
2. E pule le Atua i lo tatou ola.

3. Ia faatuatua ma talitonu i le Atua i taimi uma.

### **TATALO:**

Ia i lau Afio pea e faavavau le viiga ma le faaneetaga, ona o lou alofa faamaoni. Faapalepale mai i lo matou ola sesē i ou luma. Foa'i mai ina ia matou iloa tino lou alofa. Amene.

.....

**ASO SA: 28 IUNI 2015**

**MATAUPU: O LE VAI UA LIU UAINA**

**SINI:** Ia a'oa'o le vasega ia malamalama na faaliliuina e Iesu le vai e avea ma uaina.

**TUSI FAITAU:** Ioane 2: 1 – 11

### **FESOASOANI MO FAIAOGA:**

O le vai ua liu uaina, o le ulua'i vavega lenei na fai e Iesu. Sa fai le tausamaaga i Kana i Kalilaia, sa valaaulia ai Iesu ma ona so'o. Sa i ai foi le tina o Iesu i le tausamaaga o le faaipoipoga lea. O faaipoipoga i nuu ia i taimi o Iesu, e atoa le vaiaso o fai ia fiafia ma tausamiga e faamanatu ai. o lona uiga e moomia le lava o tapenaga mo mea uma. O le mea na tupu, ua uma le uaina o le tausamaaga. O le mafuaaga lea o le alu ane o Maria iā Iesu ona ta'u atu lea ia te ia, "Ua leai sa latou uaina." O lo o talitonu Maria e mafai e lana tama, ona fesoasoani i le faafitauli ua tulai mai. O le mafuaaga lea o lona

faatonuina o auauna, o le a lava se mea e fai ane ai Iesu, ia latou faia. E ui lava sa tali ane Iesu, e lei oo i lona itu aso, ae sa tumau pea le talitonu o lona tina.

Mulimuli ane, sa faatonu e Iesu auauna ia faatutumu vai maa tetele e ono i suavai, a uma ona asu lea ma ave i le alii pule o le tausamaaga. Sa faapea ona faia e auauna e pei ona faatonuina ai i latou. Ina ua tofo le pule o le tausamaaga i le vai ua liu uaina ua ia iloa ai le eseese, ma le uaina na avatu muamua. O lea na ia valaau atu ai i le faatoafaiava. "E muamua ona aumai e tagata uma o le uaina lelei, pe a tele foi le inu i ai o tagata ona aumaia lea o le uaina leaga, a ua tuu e oe le uaina lelei, ua oo mai i lenei itu aso." O le faailoga na faia e Iesu i lea aso na tupu ai le faatuatua o ona so'o, auā ua fa'aalia ai lona mamalu ma le mana o le Atua.

### **Uiga o Upu ma Fuaiupu:**

- i). tausamaaga - aiga fiafia o le faaipoipoga
- ii). faatoafaiava - tama faatoa fai lona toalua
- iii). faailoga - o vavega

### **GALUEGA FAATINO:**

Tali mai i Fesili:

1. O fea na fai ai le tausamaaga lea sa auai i ai Iesu ma lona tinā?  
Tali: O Kana i Kalilaia
2. O le a le mea na tupu, na mafua ai ona manaomia le fesoasoani a Iesu e lona tinā?  
Tali: Ua uma le uaina o le tausamaaga.
3. O le a le tali a Iesu i lona tinā ina ua ia faailoa atu "ua leai sa latou uaina?"  
Tali: "Funa e, se a ea lau na ia te au? E le'i oo i lo'u itu aso aso."



4. O le a le vavega na faia e Iesu i le aso lea?

Tali: Ua liliuina e Iesu le vai e avea ma uaina.

5. Ina ua tofo le pule o le tausamaaga i le uaina mulimuli, o le a sana tala?

Tali: “E muamua ona aumai e tagata uma o le uaina lelei, pe a tele foi le inu i ai o tagata, ona aumai ai lea o le uaina leaga, a ua tuu e oe le uaina lelei, ua oo mai i lenei ituaso.” (vs 10).

**PESE:** Pese 5 (Pese ma Viiga)

**A’OA’OGA:**

1. Ua liliuina e Iesu le vai e avea ma uaina.
2. Tau i le Atua ou manaoga aua e tali mai o Ia.
3. E sili atu le lelei o mea e faia e le Atua.

**TATALO:**

Faafetai tele lava i lou alofa le Atua mo i matou uma. Faamolemole, faamagalalo lo matou leaga, ma tausii mai i matou i lou alofa faavavau. Amene.

.....

**MANATU TAIALA O IULAI : E I AI LE TAIMI O LE ATUA**

E i ai taimi tatou te mananao ai e fai se suiga lelei, ina ua tele faafitauli e tutupu mai ona o le ola soona fai. O le upu moni e le mafai ona maua se suiga lelei, seiloga e talia i le atoatoa ma le faamaoni e le tagata le Atua i lona loto. O le taimi tonu lea e lagona ai e le tagata le pai mai o le filemu o le Atua.

**ASO SA:** 5 IULAI 2015

**MATAUPU:** IA LAFOA’I E LE TAGATA AGASALA ONA ALA

**SINI:** Ia a’oa’oina tamaiti ia malamalama, o o tatou ala ma manatu, e le o le finagalo lea o le Atua pe afai tatou te le o ese mai le agasala.

**TUSI FAITAU:** Isaia 55: 6 – 9

**FESOASOANI MO FAIAOGA:**

O le tusi a Isaia o le ulua’i tusi lenei a le au perofeta i totonu o le Tusi Paia. E tolu feau taua o lo o i totonu o le tusi lenei a Isaia; (1) Toe foi, (2) Salamō ma (3) Toe faafouina. O le o ‘ese mai o Isaraelu mai le Atua, na mafua ai ona faasala e le Atua. Ua faagalalo e Isaraelu le Atua, ua latou ifo atu i tupua, ma latou solia tulafono na taitaiina ai lo latou ola manuia. Ua oo ina nofo pologa Isaraelu i atunuu ese, e i ai Asuria ma Papelonia. O le nofo pologa foi o Isaraelu i nei atunuu, ua latou manatu ai foi, ua faagalalo latou e le Atua. Ua tele le agasala o le nuu, ua fiafia e ola i se olaga pologa ma le toilalo. O le mafuaaga lea na mafua ai ona tau atu e le perofeta i le nuu ina ia latou o ‘ese mai le agasala, ae foi mai i le Atua e maua ai le manuia.

O le mataupu lenei e 55 o le tusi a Isaia, o lea ua valoia ai le toe maua e Isaraelu o le manuia mai le Atua. O lea foi ua tau atu e le perofeta, e

le mafai ona galo latou i le Atua. Aua nei manatu le tagata e faagalo o ia e le Atua. O le Atua lava, e alofa pea, ae ia iloa e le tagata ona toe foi, salamō ma faafouina lona ola e ala i lona talia atoatoa o le Mesia lea o le a afio mai, o Iesu Keriso.

### **GALUEGA FAATINO:**

Fesili ma Tali:

1. O a vaega taua e tolu o le Tusi a Isaia?

Tali: (1) Toe foi (2) Salamō (3) Faafouina.

2. O ai atunuu lea na nofo pologa ai Isaraelu?

Tali: Asuria ma Papelonia.

3. Aisea na agasala ai Isaraelu?

Tali: Ua faagalo le Atua.

4. O le a le manatu o tagata Isaraelu ina ua nofo pologa i atunuu ese?

Tali: Ua faagalo latou e le Atua.

5. O le a le uiga o le upu lafoa'i?

Tali: Ave'ese/ tia'i.

### **A'OA'OGA:**

1. Ia manatua le Atua i taimi uma.

2. E faavavau le alofa o le Atua.

3. E leaga le ola pologa.

### **TATALO:**

Matou te faafetai atu i lenei taeao i lou alofa ma lou faamaoni le Atua mo matou. Faamagalalo lo matou ola sesē i ou luma, ma lavea'i mai matou i lou alofa e le aunoa. Amene.

.....

**ASO SA: 12 IULAI 2015**

**MATAUPU: O LE ASŌ TA TE FAATASI AI MA OE I PARATAISO**

**SINI:** A'oa'o tamaiti ia latou iloa, o taimi faigata o le ola, e mafai ona avea ma ituaso o le olioli loloto o le tagata, pe afai o taimi tonu ia na te iloa moni ai le Alii o Iesu.

**TUSI FAITAU:** Luka 23: 39 – 43

### **FESOASOANI MO FAIAOGA:**

O tala faamauiina e uiga i puapuaga o Iesu, o lo o tusia uma e le au-fai-Evagelia. O le mataupu la o le Asō, o lo o fia faamamafa ai le tali a Iesu i se tasi o pagota, i taimi ogaoga o ona tigā i le satauro, ae ua avea ma ituaso o le olioli ia te ia le talia o ia e Iesu i Parataiso.

O le faamauga a Luka, e toa 2 pagota sa faasala faatasi ma Iesu, e ala i le faasatauroina. O ia pagota na mafua ona faasala ona o le amioleaga ma le faia o agasala. A o Iesu le Alo o le Atua, o lo o iloa uma lava; o lona faasatauroina, lona maliu, ma lona toe soifua manumalo mai, o le taulaga lea o le Faaolataga ua Ia saunia mo le lalolagi, a o Ia e leai sana agasala.

A o faatautauina le Alii ma isi pagota e toalua, sa valaau le tasi pagota i se iuleo le migao iā Iesu, - "Afai o oe o le Keriso, ina faaola ia oe iā te oe, atoa ma i maua nei." A o le isi pagota, na te iloa le Alii ma āva iā te Ia; ua fai atu i le pagota lea; "O oe o se tagata lē mata'u, auā ua tatau la ta sala e tusa o a ta agasala, a o Ia nei, e leai se leaga na faia e Ia." Ona liliu ane lea o lea pagota na te iloa Iesu ma faapea atu ia te Ia; "Iesu e, ia e manatua mai a'u, pe a e afio mai i lou malō." O lana tautinoga o lona loto faamaoni, ona tali mai lea o Iesu iā te ia, "E moni, ou te fai atu iā te oe, o le asō ta te faatasi ai ma oe i parataiso."

Tamaiti, taimi tonu ia o le Atua tatou te moomia; taimi tatou te tautino ai i le loto moni lava, o Ia o le Alo o le Atua Soifua. Po’o a la faigata tatou te fetai’i, e galo uma ma liua e fai ma olioli, pe a talia i tatou i lona Alofa Tunoa.

### Uiga o Upu ma Fuaitau:

- i). f.(40) le mata’u - le āva/le fa’aaloalo
- ii). f (40) parataiso - o se mea matagofie

### GALUEGA FAATINO:

Taliga Fesili (Sa’o pe Sesē? Tusi na o le tali)

- 1. Afai o oe o le Keriso, faaola maua ma oe! O le tagata leaga e ona upu ia”

Tali: Sa’o.

- 2. “Ua tonu lava la ta sala;” (f.41). O upu tautino ae lē o se fia lelei.

Tali: Sa’o.

- 3. “Fai mai Iesu i le pagota, ta te faatasi ma oe i parataiso i le asō. Amuia lea pagota, aua e le’i oti.”

Tali: Sesē.

- 4. Manatua mai a’u pe a e afio mai i lou malo. O le iuleo a le tagata faatuatua ma talitonu ia Iesu.

Tali: Sa’o.

- 5. Na faasatauro Iesu ona o le agasala a tagata ese ae le o pagota ia e toalua?

Tali: Sesē. (E aofia uma ai lava)

**PESE:** 239

### A’OA’OGA:

- 1. Faamaoni le loto.
- 2. E matagofie le salamo moni.
- 3. Fiafia e mafuta ma Iesu.

### TATALO:

Faafetai ua matou maua lenei Aso Sa manaia i lau tausiga agalelei le Atua. Faatoese atu i lo matou le āva i lau Afio lo matou Tamā. A’oa’o mai ina ia matou iloa moni oe i ō matou loto faamaoni, matou te talia moni ai lou finagalo. Amene.

.....

**ASO SA:** 19 IULAI 2015

**MATAUPU:** O LE LOTO FAAMAUALUGA

**SINI:** A'oa'o tamaiti ina ia latou iloa, o le loto faamaualuga, o le manatu ifo lava lea o le tagata i lona loto, o mea ua ia maua ma lona mafai o i ai, e pogai mai i lona lava potu ma lona malosi e aunoa ma le Atua.

**TUSI FAITAU:** Tanielu 4: 19 – 33 (Faiaoga)  
Tanielu 4: 26 – 33 (Vasega)

**FESOASOANI MO FAIAOGA:**

**Vaaiga lautele:**- O Nepukanesa, o le tupu o Papelonua, o le tagata faapaupau e le talitonu i le Atua; peita'i, sa iloa e le tupu le silisiliese ma le mana o le Atua o Tanielu, e ala i le vavega na Ia faia, na le mū ai Tanielu ma ana uo i le ogaumu aasa na lafo i ai e le tupu. O fa'aaliga ia o le Atua i le tupu, o le ala sa tofotofu ai lona loto faamaualuga, pe mafai ona faamaulalo i luma o le Atua. O le faigata ona iloa e le tupu o le moni o le Atua, o lea na toe fai ai le isi ana miti, o ala lava o tau sufi ai lona loto ina ia na iloa le silisiliese o le Atua.

O le miti lea o lo o faamatala mai le amataga o le Mataupu e 4, o le miti i le laau tupu mauualuga ma mafalā, e iloa mai tulimanu uma o le lalolagi lona mauualuga. E ofaga i ai manu felelei, a'e malu foi i lalo o lona paolo manu tata'a o le laueleele; e fua tele ma matagofie. Ae tei ua sau le leoleo, o le tagata paia mai le lagi ma valaau mai, tu'u i lalo le laau, vavae ese ona la ma faata'apeape ona fua ma lau, ina ia sosola ese uma manu sa mapu ai. Tuu ai pea lona pogai, seia atoa tausaga ma sei liua lona loto.

Na o Tanielu sa ia mafai ona faamatala le uiga o le miti a le tupu. Ma o le laau o le tupu lava lea, e mauualuga, mamalu ma tamaoiga; sa logologoa ma iloa uma e le lalolagi. A'e o le tele o lona faamaualuga ma lona le iloa o le Atua, o lea na sau ai le leoleo, o Tanielu lava lea,

ma tau i ai le uiga. A iloa e le tupu le silisili ese o le Atua, ona tumau lea o lana nofoaiga, ae a tumau pea lona faamaualuga ma lona le iloa o le Atua, ona tafiese lea o lona mamalu.

**O le tala:**- O le vaega sa faitauina o le Tusi Paia, na pau lena o la tatou mataupu o le aso. Ua na o le faamatalaga o le iuga o le tupu, talu lona loto faamaualuga, na te lei talia le upu a le Atua, e ala mai ia Tanielu lana auauna. f. 26 – 27, o le avanoa e faasaoina ai le tupu. Tau lava ina ia na iloa le pule aoao a le Atua i le lagi ma le lalolagi, ma mea uma lava e aofia ai ma ia. Auā a iloa e lona loto ona faamaulalo, ma ia lagonaina ai le alofa i ē matitiva; o iina foi e tumau ai pea lana nofoaiga ma maua ai pea lona filemu.

**f.28 – 33:** E tasi le tausaga talu ona fai le miti ma iloa lona uiga, ona taunuu loa lea o le uiga o le miti, ona e le'i mafai e Nepukanesa ona faamaulalo lona loto i luma o le Atua. Ua tulia le tupu mai le nofoalii, ta'a i le pa e pei o le manu, ai i le mutia e pei o le povi, ma sautia i le po. O le iuga lē manuia lea na o'o i ai le tupu faamaualuga o Nepukanesa, ma o se a'oa'oga taua foi mo tatou le fanau. E leaga le loto faamaualuga. E le faigata i le mana o le Atua ona ia liliuina le tagata, ae lē mafai ona suia fua e le Atua le tagata i ona vavega, pe afai na te le tautino, o Ia o lona Alii.

**GALUEGA FAATINO:**

1. Fai se faatinoga pu'upu'u o le tala. Amata mai ia Tanielu ma le upu o le Ola na ia fai atu ai le tupu. Ae toe faaiu foi ia Tanielu, i lana upu faamalaia ma lona taunuuga matagā na oo iai le tupu.
2. Fetufaa lava outou i ni fesili ma tali, e te silafia ai ua malamalama le mataupu i tamaiti.

**PESE:** 222 (Aue loto ua leaga, Ua matua soesa)

**A’OA’OGA:**

1. Faamaulalo le loto i luma o le Atua.
2. Alofa i tagata vaivai.
3. E leaga le fia sili.

**TATALO:**

Faafetai i lou alofa le Atua, ua maua ai le ola ma aumai ai i matou uma i lenei taeao i le manuia. Ia maua e i matou uma ma lau fanau uma lou manuia i lenei Aso Sa, ma aso uma lava. Faamagalalo lo matou loto faamaualuluga, ua na punitia lo matou iloa moni o oe. Amene.

.....

**ASO SA: 26 IULAI 2015**

**MATAUPU: ONA ATAMAI AI LEA O IA.**

**SINI:** Ia malamalama tamaiti, po o le a lava lo tatou agasala, e alofa pea le Atua pe afai e salamo moni.

**TUSI FAITAU:** Luka 15: 11 - 24

**FESOASOANI MO FAIAOGA:**

O le tala i le uii, o se tala ua tatou masani ai, ae le mafai ona aveeseina ai lona taua tele, pe a fua i mea o lo o tutupu mai pea, i le va o matua ma fanau i nei aso. O le upu moni, e foliga mai ua faateteleina, ma e aoga ai lenei tala, e fai pea ma faamanatu i le fanau.

Fai mai le tala, ua manao le uii i le vaega oa ma sei alu e faamalie lona loto. (Upu masani, ua fia ta’a le uii). O vaevae faa-Iutaia, o mea a le aiga i le va o le tamā ma lana fanau, e 1/3 e ave ma le atalii laitiiti, ao le 2/3 e ave ma le ulumatua. A o nei fuafuaga uma, e faataunuu pe afai e oti le tamā.

Lea ua manao le uii i lana vaega, ae o lo o soifua pea le tamā. Le faailoga o le loto maa’a ma le lē usita’i. Ae ui lava i lea, ae na malie lava le loto o le toeaina e ave ai lana tupe. Ia e ui e le o taua mai i le tala, ia e manatu ai ua fiu si toeaina e faufautua ai, ae ua le mafai lava le loto fia tafaovale o le atalii. Ua alu le atalii, ma ua soona fa’aalu le oa ia, ma tuinanau solo.

Ua oo ina mativa masaesae. Ua fia ai solo, ma aisi solo i tagata. Ua oo lava ina aai faatasi ma puaa le faailoga o le tagata ua matuai olopalaina ona o le agasala, ua saisaitia ona o le lē usitai ma le loto faamaualuga. Ae atonu o le mafuaaga lea na tuu ai pea e le tamā lona atalii sei alu, e le ona o le lē alofa, ae sei alu e vaai i le lalolagi tele ma aoaiga ai lona mafaufau.

“Ona atamai ai lea o ia.” O le pau o le uii i le loloto o le agasala, na ia toe manatua ai lona tama. “O le a ou tulai ma alu i lou tamā.” Upu a

le tagata ua matuai lagona ifo i lona loto le salamō faamaoni, ma ua toe fia foi i aao alofa o le Atua.

Le faailoga lea o le alofa faamaoni o le tamā, na ia faatalitali pea i le taimi e toe sau ai le atalii i le aiga. Ua momoe, e lei faatali sei oo atu le uii. Ua fai le aiga tele. Ua faamama ma faaofu, le faailoga o le le aveesea lava o le tulaga o le uii, o ia o lona atalii faapelepele.

Po o le a lava lo tatou o ese mai le Alii i le tele o taimi, o loo faatali mai pea o Ia, pe afai tatou te toe foi atu ia te Ia, tusa lava pe agasala le tagata.

### **GALUEGA FAATINO:**

“Manaiā pe a faatino le tala”

**PESE:** 22

### **A’OA’OGA:**

1. “Tulafono e 5” Ia e ava i lou tama ma lou tina.
2. Ia iloa ona toe foi i le Atua.
3. Aua nei galo le alofa o matua.

### **TATALO:**

Faafetai mo au faamanuiaga o matou ola i aso uma. Faamagalō mai lo matou ola sesē pea e le aunoa. A’oa’o mai ina ia moni ona matou iloa lou alofa faamaoni, o lo matou atamamai lava lena. Amene.

.....

## **MANATU TAIALA O AOKUSO: FAAILOA LOU TAGATA TALITONU MONI I LE ATUA**

Ua tatou masani i taiga o le ola o fai nei mo tatou, e mafuli lava ina toilalo le tagata i lo la va nonofo ai ma lona Atua, ona e tele lava i le na o le folafola ma tautino e talitonu i lona alii, ae seāseā ona tino mai ia tautinoga. Ma o le faamanatu taua lea mo tatou uma, ia faaitiiti lo tatou folafola atu, ae faatele lo tatou usitai ma faia le mea o finagalo ai lo tatou Alii. Auā o le malo o le Atua, e le o upu, a’o le tino mai o upu e ala i lo tatou galulue ma ola ai.

**ASO SA:** 2 AOKUSO 2015

**MATAUPU:** ALOFA TAUMULIMULI E O’O I LE OTI

**SINI:** Ia a’oa’o tamaiti ia latou iloa le moni o le alofa o Ruta ia Naomi, ona ua lē mafai ona ia toe tuua o ia e foi na o ia i lona nuu, a ua ia mulimuli ai pea, sei faaiu lana tausī iā te ia.

**TUSI FAITAU:** Ruta 1: 14 – 18

### **FESOASOANI MO FAIAOGA:**

O le tala malamalama lava lenei tala; o le oge tele i Iuta, le pogai autu na malaga ‘ese ai le ulugalii ma la la’ua fanau mai Efarata i Iuta, ma nonofo i Moapi. Peita’i, po o le sefulu pe sili atu laititi nai tausaga sa aumau ai i latou i Moapi, ae maliliu uma le tamā ma lana fanau tama e toalua; ona totoe ai lea o le loomatua o Naomi le toalua o Apimeleka ma taitoalua o la laua fanau o fafine o Ruta ma Orepa mai Moapi.

O le puapuaga lea sa fetaia’i ma le loomatua o Naomi na manatu ai loa o le a toe foi i lona nuu o Efarata i Peteleema; ae nonofo pea taitoalua o si ana fanau i lo latou nuu o Moapi. Peita’i e le’i faigofie lea tulaga, ona ua malie Orepa o le a alu i lona aiga, a’o Ruta, e le’i

mafai ona toe foi i lona aiga. O se taumavaega faigata lea taumavaega, auā e ui lava ina e le'i maua ni fanau a Maalona ma Kiliona ae sa le'i mafai lava ona nofo Ruta. Ona tulai lea o Orepa ua sosi ia Naomi le tinā o lana tane ma alu loa, a'o Ruta e le'i mafai. Fai mai a ia "Naomi", 'aua e te finau ia te a'u ina ia ou tu'ulafoa'i ia te oe, ia le mulimuli atu ia te oe. Auā o le mea e te alu i ai, ou te alu foi i ai. O le mea foi e te nofo ai, ou te nofo ai foi. E fai lou nuu mo'u; E fai lou Atua mo'u, o le mea e te oti ma tanu ai oe, ou te oti ai ma tanu ai foi a'u." Talosia i le Atua, ia na faia faapea e tusa o lo'u manao, vagana ua tu'ueseeseina tā'ua i se isi mea, e ese mai le oti. Ua iloa e Naomi le mausali ma le pipii o le loto o Ruta iā ia, ona ia lē toe finau lea ia te ia, ae ua faia loa e tusa o lona manao.

### Uiga o Upu ma Fuaitau:

- i). sosi (f.14) kisi
- ii). tu'ulafoa'i (f.16) tuua e pei o se tagata ua lē alofagia/tiaiina
- iii). "mo'u nuu po'o mo'u Atua" (f.16) – e fai foi ma o'u nuu/e fai foi ma o'u Atua (O le mea lava e fai mo Naomi, o le mea foi lena a Ruta).

### GALUEGA FAATINO:

(Vaai ma faitau; Ruta 1: 14 – 18, ona tali mai lea o fesili o i lalo e iloa ai e te malamalama i lau mea o faitau)

1. O ai tagata ia e fetagisi e pei ona ta'ua i le f 14?

Tali: O Orepa ma Ruta, ma le tinā o le tane a Orepa.

2. O ai le tagata lea ua fo'i, e pei ona taua i le f.15.

Tali: O Orepa

3. O ai le tagata lea e ono tu'ulafoa'iina i le tala?

Tali: O le tinā o taitoalua o Ruta ma Orepa. (Naomi)

4. O Ruta o se fafine lelei toe finau vale, pe lelei toe alofa?

Tali: E lelei toe alofa.

5. O le a le mafatiaga sili ona faigata o feagai ma Naomi, e tusa o lau faitau i le tala?

Tali: Ua oti le toalua, feoti uma ma le fanau i nuu ese.

**PESE:** E le alofa o Iesu  
Na maliu talu ita nei

### A'OA'OGA:

1. O tinā mafatia
2. E lē fo'i le alofa i le oti.
3. E lelei le mulimuli faamaoni.

### TATALO:

Tumau le viiga ma le faafetai i lau afio lo matou Atua, ona o lou alofa matalasi mo i matou. Faamagalalo matou le fanau, ona o lo matou lē fiafia e mulimuli atu ia te oe. Foa'i mai lo matou malosia i le tino, ma ia lagona faamaoni i o matou loto le alofa, e pei ona e faia mo i matou. Amene.

.....

**ASO SA:** 9 AOKUSO 2015 (ASO SA O TAMĀ)

**MATAUPU:** USITA'I IĀ IESU, A'E TU'U LOU ILOA.

**SINI:** Ia a'oa'o tamaiti ina ia latou iloa, o Iesu o le potō lava lea o le Atua, e leai se sesē o i ai. O le ala lena e lelei ai le usiusita'i ia te Ia, a'e tu'u lo ta iloa ma le atamai, e iai lava taimi e aogā ai.

**TUSI FAITAU:** Luka 5: 1 – 8

### **FESOASOANI MO FAIAOGA:**

O le galuega tala'i a Iesu, e le faapitoa se nofoaga e fai ai, e mai lava i atumauga seia paia vai ma le sami, e pei ona iloa i le tala. O le auvai o le vai o Kenesareta, o le matafaga lava lea o le sami o Kalilaia, o tō tonu o lo o iai Iesu. O lo o maimoa ma matamata Iesu i le faiva o fai i le sami, o Simona ma isi o lo o fagogota, ae o lo'o tau o latou va'a i le aloalo. O le lolofi atu o tagata e matamata ma faalogologo i afioga a le Atua mai iā Iesu, na malii a'e ai loa Iesu i le va'a o Simona, ma fetalai atu iai e tu'utu'u laitiiti i tai le vaa. O iina na ia alala ai ma a'oa'o mai i le motu o tagata.

O le uma o le lauga a Iesu, na ia toe fetalai ai loa ia Simona, e "tu'utu'u le vaa i le loloto ma tu'u ifo ai le upega, e maua ai ni i'a."

Sa i ai si masalosalo o Simona, ona e le gata o ia o le tagata fagota e masani i le sami lea, ae ua aoina foi le po o fagogota ai e leai se i'a e maua. Peita'i, ona o Iesu lea ua fetalai atu iā te ia, o lea na tu'u ai loa le mea o ia iloa, ae usita'i loa ma fai le mea ua faatonu atu e Iesu.

Mulimuli ane, ua maua le au-i'a tele lava i le upega ma ua masae ai. Ua faigata ona latou toso a'e i luga le upega ona o le tele ma le mamafa o i'a; o lea na latou valavalaau ai i isi o i le tasi vaa e omai e fesoasoani. Ona omai ai lea, ua fu'e uta a vaa e lua, ua tutumu uma ua toeitiiti gogoto i le mamafa. Ua vaai Simona Peteru, ma ia lagona i lona loto lona faatauva, auā ua ia iloa lo la le taitai ona tutusa ma

Iesu. Ua ia faapaū i luma o Iesu ma fai atu – "Le Alii e, ina malii ese atu ia oe ia te a'u, auā o a'u o le tagata agasala."

Tamaiti o se mea lelei tele lo tatou faalogo, usiusita'i muamua i le mea o finagalo ai lo tatou Alii o Iesu, auā e i'u i le manuia. Ta'atia o tatou tomai ma iloa, sei fai mulimuli.

### **Uiga o Upu ma Fuaitau:**

- i). fetuleni (f.1) - tumutumu mai/lolofi mai/tautulei ma saili avanoa mai.
- ii). talanai (f.2) - taula/tau/faaopeopea/faasolosolo
- iii). auvai (f 3) - latalata i le matafaga
- iv). genogeno (f 7) - luelue atu ulu ma mata. (O lo o faailo atu ai le manao e omai)
- v). tali gogoto (f.7) - toeitiiti gogoto.

### **GALUEGA FAATINO:**

#### **Fesili ma Tali:**

1. O ai tagata na mafua ai ona alu Iesu i luga o le vaa?

Tali: O le motu o tagata.

2. O le a le umi talu ona fagogota tagata o ta'ua i le tala?

Tali: Ua atoa lelei le po o fai le faiva.

3. O le f.5 O le Tusi sa faitauina, o lo o iloa ai, o Peteru o le tagata e āva pe lē āva ia Iesu?

Tali: āva.

4. Aisea na faapaū ai Simona Peteru i tulivae o Iesu?

Tali: Ina ua ia iloa tino lava o Iesu lea la te fetāpaa'i, ua ia lagonaina ai foi lona faatauva'a ma lona sesē.



5. O le a le mea sa fai, na mafua ai ona maua i'a e tele?  
Tali: Ina ua tu'utu'u le vaa i le loloto, ma tu'u ifo ai le upega.

**PESE:** Faalogo ma usita'i e leai se isi ala.

**A'OA'OGA:**

1. E lelei le usita'i ia Iesu.
2. Faalogo i le afioga a le Atua.
3. O tatou o tagata agasala.

**TATALO:**

Ia tumau le viiga ma le faafetai le Atua ia te oe lo matou Tamā e faavavau. Faamagalō mai lo matou vaogata i o matou matua, ma lo matou le usiusita'i ia te oe. Tausi mai matou i lou alofa, ia paia lou Aso Sa i lo matou ola gauai ma usita'i e fai lou finagalo. Amene.

.....

**ASO SA:** 16 AOKUSO 2015

**MATAUPU:** LILIUINA SAULO E LE ALII TOETU

**SINI:** Ia a'oa'o tamaiti ina ia latou iloa lelei, le auala filemu na liliuina ai Saulo e Iesu Toetu, e avea ma ana ave feau.

**TUSI FAITAU:** Galuega 9: 1 – 9

**FESOASOANI MO FAIAOGA:**

- i) **Saulo** (Paulo) – O Saulo, le na mulimuli ane suia lona igoa iā Paulo (Galuega 13: 9) ina ua liliuina o ia e Iesu Toetu, e avea ma ana aposetolo, na te tala'iina lona Malo i nuu ese. Sa fanau Saulo i Taso i Kilikia (9: 11) o lona nuu lea. O ia o le Iutaia, ae o le tagata nuu foi o Roma (Galuega 17: 13). O le tagata sa talitonu faamaoni ma auauna i le tapuaiga Iutaia i lona faatoā soifua mai, auā o ia lava o le faresaio (Galuega 23: 6), o le ala foi lena o lona sauā i le au Kerisiano, e pei ona sa ia auai i le fasiotiga o Setefano (Galuega 7: 58), lea foi na sau ai nei e saisai atu le au Kerisiano (tagata o le Āla – O le igoa pei se upu taufaifai, sa ave i tagata e talitonu iā Iesu) e momoli i Ierusalema e faasala ma fasiotia ai.
- ii) **O lona liliuina**:- O le gauai o Saulo i le tapuaiga Iutaia, sa le mapu ai ma lona sauā, ina ia tineia talitonuga ese i lo latou manatu, e pei o le talitonuga ua sau nei e uiga iā Iesu Toetu. O le matamata ita o Saulo, auā o lea ua sau ma le faatanaga mai le ositaulaga sili mai Ierusalema, ina ia fusifusi ma saisai uma atu i latou o ta'uta'u i le suafa o Iesu. O lona agai atu i Tamaseko, sa faafuasei ona taia o ia i se malamalama tele mai le lagi, ua pupula faataliolio ia te ia. Sa paū faafuasei Saulo i le eleele, ona faalogo atu lea i le leo o faapea mai iā ia; “Saulo, Saulo e, se a le mea ua e sauā mai ai ia

te a'u?” Sa fesili atu Saulo po o ai lea? auā na o le faalogo i le leo, ae na te le o vaai i se tasi. Ona toe sau lea o le tali ma faapea mai;- “O a'u o Iesu, na e sauā mai i ai.”

Sa matuā faaletonu Saulo, auā o i latou uma o tautala ma mulimuli i le igoa lea, lea ua feiloai tonu mai lava iā te ia i lea taimi. Ona fai atu lea o Saulo ma le mata'u i le Alii, “Le Alii e, se a se mea e te finagalo i ai ou te faia?” Ua fetalai atu Iesu iā Saulo, tu ia i luga e alu i le aai, o le a tau atu lava ma e iloa le mea e te alu e fai!” Ona fetagofi lea o ē na latou omai i ona lima, ua faatu o ia i luga ma taitai atu i le ala i Tamaseko, auā e lē o iloa e ia se mea, a o i latou foi, na ona lagona ae latou te lē o vaai foi i se tagata. O le molimau, e tolu aso na te lē o iloa se mea, e le'i ai pe inu foi i ia lava aso. Tamaiti po o le a le sauā, le matautia, ma le ma'ema'eā o le lalolagi, e pei o Saulo ma lona taufaamata'u i le au Kerisiano, ae na liliuina lava lona loto e Iesu Toetu, i le ala toafilemu na fa'aalia ai le Alii iā te ia.

#### Uiga o Upu ma Fuaitau:

- i). mapugatamai (f.1) - Pei o se ma'i faigatā ua le maua se mapu/le uma le manao ma le naunau/naunau tele/ ma'i valea.
- ii). faamata'u (f.1) - faafefe
- iii). faatoga (f.2) - faanoi/talosaga iai mo se faatanaga.
- iv). “nisi o le Ala” (f.2) - O le Āla, o le igoa e ave i tagata o talitonu ma mulimuli ia Iesu.
- v). “a'a i tui” (f.5) - (Ua lē o manino mai i le lomiga faapapalagi o iai nei, (New Revised Standard Version), NRSV, le fuaitau tonu o faa-Samoaina faapea. Peita'i, atonu o se upu o tu'u i ai i le lagona faapea – E lē faigofie iā Paulo ona ia a'aina se tui, po o se mea

maai.” A faauiga i lana mea ua fai nei iā Iesu, e ala i le au Kerisiano.

- vi). matau (f.6) - E lē o le fefe, palaai, a'e o le lagona ua li'a-tino, ma tau iteite i le matautia ma le sili atu o lē ua la feagai nei.
- vii). “ua le mafeganavai” - ua lē mafai ona tautatala.

#### GALUEGA FAATINO:

##### Taliga Fesili:-

- i) O le a le mafuaaga na alu ai Saulo e saisai ma fusifusi mai le au Kerisiano na maua i Tamaseko?  
Tali: O le taumafai lava lea e tineia le talitonuga ua alia'e nei faa Kerisiano, o i latou e talitonu ma mulimuli iā Iesu.
- ii) O le pule a ai na fai ai e Saulo lea mea?  
Tali: O le pule a le ositaulaga sili
- iii) Na taunuu le mea na faatonu Saulo e alu e fai pe leai? Tau mai le mafuaaga o lau tali!  
Tali: E lei taunuu.  
Mafuaaga – Ona ua taofia e Iesu Toetu i le ala, ma suia ai loa le faamoemoe sa agai iai Saulo, o le tala'iina lea o le finagalo o Iesu Toetu.

“Saulo, Saulo e, se a le mea ua e sauā mai ai ia te a'u?” O le fuaitau lea o lo o i le f.4 (Tali mai ai fesili iv – vi)

iv) O ai e ona upu ia?

Tali: O upu a Iesu

v) O ai na fai iai?

Tali: O Saulo.

vi) O le a le uiga o ia upu a Iesu, a'e le'o ta'ua i le Tusi Paia, na sauā Saulo iā Ia?

Tali: O le uiga o upu a Iesu, O le sauā o fai nei e Saulo ia i latou o talitonu ma mulimuli ia Iesu, o le sauā lava lenā o Saulo ia Ia.

**PESE:** There's no one, there's no one like Jesus.  
E leai se sili atu ia Iesu.

#### **A'OA'OGA:**

1. Liliu e Iesu le olaga o Saulo.
2. Faalogo ma lagona le Alii.
3. E mamana ala o le Alii.

#### **TATALO:**

Alofa mai oe lo matou Atua ma faamanuia mai ia matou le fanau i lenei aso atoa. Ia vave ona matou lagonaina lou fetalai mai. Faafetai mo le ola ma mea uma. Faamagalō mai lo matou lē usiusita'i ia oe Iesu. Amene.

.....

**ASO SA: 23 AOKUSO 2014**

**MATAUPU: E LEI PEPELO HANA I LE ATUA**

**SINI:** Ia a'oa'o tamaiti ina ia latou iloa ma talitonu i le faamaoni o Hana i le Atua; auā na faatoga i le Atua mo sana tama, ae na te toe avatu mo Ia.

**TUSI FAITAU:** 1 Samuelu 1: 24 – 28

#### **FESOASOANI MO FAIAOGA:**

**Hana:-** O Hana, o le tasi lea avā (toalua) a Elekana, a'e pa e lē fanau, ma o se faanoanoaga tele lea iā te ia i le tele o aso o lona ola. O lo o tau mai e le Tusi Paia, na lē fanau Hana ona o le pule a le Alii. E fai la o le leai o sana tama, a ua faatetele lona faanoanoa, ona o le tufa'alili o Penina le tasi avā a Elekana ia te ia, auā sa ia Penina fanau e toatele.

**O Elekana:-** O Elekana le toalua o Hana, o lana masani i tausaga uma o le alu lea i Sailo e fai le taulaga i le Alii ma tapuai ai. O aso uma e fai ai taulaga a Elekana na te tufa ai tufaaga taitasi ma Penina ma lana fanau, a'o Hana e lua ana tufaaga, ona e alofa tele i ai Elekana. Peita'i, e lei avea lea ma ala e matū ai loimata o Hana, pe mau ai foi lona lagona faanoanoa e oo lava i se ai, ua lē mafai. Ua iloa foi e Elekana le mafatia o Hana, o le ala lea o lona sufi pea o ia, ia na iloa le sili o lona alofa iā te ia, se i tau faamafanafana ai i lona loto.

**Tautoga:-** O le tasi aso, na alu ai loa Hana i le malumalu i Sailo, o iai le toeaia o Eli le ositaulaga. Ua ole atu Hana ma tatalo i le alii ona o lona tigā. Ua ia tauto ma fai atu. “Le Alii o a'u e, afai e te silasila mai i le puapuaga o lau auauna fafine, ma e manatu mai ia te a'u, ..... ma e foa'i mai i lau auauna fafine se tama tane, ona ou foa'i atu lea o ia i le Alii i aso uma o lona ola, e le oo foi se tafi i lona ulu.” Ua tali mai le Atua i le tatalo a Hana, auā sa ia fanau mai lana tama tane, ua

ia faaigoa ia te ia o Samuelu (O lona uiga – Ua faafogaina e le Atua).

**O le Tala:-** Ua tea le tama o Samuelu ma le susu, ona alu lea o lona tinā o Hana a’o laitiiti lava le tama, ua momoli atu o ia i le malumalu i Sailo. Sa ave foi e le fafine povi taanoa e tolu, efa e tasi o falaoa, ma le fagu pa’u o uaina.

Ona fasi lea le tasi povi, ona avatu ai lea o le tama o Samuelu iā Eli le Ositaulaga Sili, ona fai atu lea o Hana iā Eli, “O le tama lea sa ou tatalo atu ai i le Alii, i le aso sa ta iai iinei ma oe: Ua foa’i mai e le Alii e tusa o la’u faatoga, ou te toe tu’uina atu ai nei o ia i le Alii i aso uma e ola ai o ia.” Ona ifo lea o Hana i le Alii i lea mea, ma toe foi i lona aiga.

#### Uiga o Upu ma Fuaitau.

i). “povi taanoa” (f 24) - povi laitiiti

ii). efa (f.24) - O le fua o le suavai e faapea 1 efa = 8 ½ kalone (Esoto 16: 36; Isaia 5: 10) 1 efa = 1 paita (Esekielu 45). Ua lē o iloa tonu lona fua sao i nei po, pe a tu’u mai ia tatou.

#### GALUEGA FAATINO:

Taliga Fesili

1. O le a le mea e iloa ai, e le’i pepelo Hana i le Atua e tusa o le tala sa faamatala nei?

Tali: Sa faatoga Hana i le Atua e fia maua sana tama tane, afai e talia e le Atua lana tatalo, na te toe foa’i atu lava le tama e maua mo Ia, (Le Atua) O le mea lava lene sa fai.

2. O le a le fuaitau, po o le faaupuga, o i ai i le Tusi Faitau, o lo o faasino i le malumalu?

Tali: (f 24) – “fale o le Alii i Sailo”

3. O fea le mea na ifo ai Hana i le Alii, ona alu ai lea o ia, a’e tu’u le tama o Samuelu?

Tali: O le malumalu.

4. O le a se lesona po o se a’oa’oga aogā mo tatou tamaiti, o maua mai le mea ua fai e Hana?

Tali: Aua le pepelo/Faamaoni i lau Tautoga i le Atua.

5. O le a le taimi na ave ai Samuelu iā Eli?

Tali: Ina ua tea o ia ma le susu.

**PESE:** Nothing is impossible, when you put your trust in God  
E leai se mea e le mafai, pe a faatuatua i le Atua

#### A’OA’OGA:

1. Faamaoni i le Atua.
2. ‘Aua le pepelo.
3. Fiafia i le malumalu.

#### TATALO:

Faafetai alofa lo matou Atua iā i matou, ua matou aulia manuia mai lenei Aso Sa. Faafetai mo le ola ma mea uma lava. Faamagalo lo matou tala pepelo i o matou matua. Agalelei oe ma tausii mai matou uma i lenei vaiaso. Amene.

.....

**ASO SA:** 30 AOKUSO 2015

**MATAUPU:** MUAI SAILI I LE ATUA I LE TATALO

**SINI:** Ia a’oa’o tamaiti ia latou iloa le taua ma le lelei o le tatalo ma tu’u atu i le Atua so o se mea o manatu ai le tagata, auā o Ia e faasino mai le ala, ma faamalosi mai iā tatou.

**TUSI FAITAU:** Neemia 1: 1 – 11 (mo le Vasega)  
Neemia 1: 1 – 2: 8 (mo le Faiaoga)

### **FESOASOANI MO FAIAOGA:**

**Neemia:** O Neemia o le tagata sa Iuta, o le tafeaga lea e mafua ai ona nofo ma fai ma tautū uaina a le tupu o Aretaseta i le maota i Susana. E ui lava o lona olaga atoa o Papelonia, ae le’i mafai lona naunau e fia alu i lona nuu o Iuta, ma Ieruselema lona laumua, e ogatotonu i le tapuaiga i le Atua. O lona faalogo i le tala, o lo o tulaga pagatia pea, pei se aai ua tu’ufua Ieruselema, o lea na ia talosaga ai i le tupu ae ala atu i lana tatalo i le Atua mo se faataga na e alu ai. E le o Neemia le tagata muamua o le tafeaga na foi, sa muamua atu iā te ia Serupapelu ma isi, soso’o atu ai ma Esera ma isi foi tagata, a’o lea ua tolu vaega iā te ia ma isi, o le a agai atu i Ieruselema.

**O le tatalo ma le mau na mafua ai:** A’o auauna tautū uaina Neemia i le Maota o le tupu o Aretaseta, na faateia o ia i le tala na aumai e Hanani lona uso, ma isi tagata mai Iuta, e uiga i le tulaga faaletonu o i ai Iuta, ae maise le aai o Ieruselema. O tagata o i ai i le nuu ua matuā feagai ma puapuaga, ae maise le tulaga lē maopoopo o iai. Ua soloia i lalo le pa o Ieruselema ma ona puipui ua mū i le afi. O se tala sa matuā lagona ai e Neemia le faanoanoa, ma ua manatu ai e fia alu e toe faaea le aai i se mafai ma se iloa na te maua. O iina na lagona ai e Neemia, auā o le tagata faatuatua o ia, o le Atua e fesili ma tapa i ai i

mea uma. Ona ia tagi lea, anapogi ma tatalo i lona Atua, e alofa ma faafofoga mai i lana aioi atu.

Fai mai Neemia; “Le Alii e, le Atua o le lagi, ou te aioi atu ia te oe, o le Atua silisili ma le matautia; o lē e tausia le feagaiga ma le alofa i ē alolofa atu iā te Ia, ma tausi i ana poloaiga...” (Neemia 1: 5[ff]). Sa tautino lava e Neemia i lana tatalo le tulaga agasala ma le agaleaga o ona tagata ma lona nuu iā te ia. O lana aioi i le Atua, ia tō mai e le Atua le pule, ma auala mai le Atua le faatagana e alu ai e toe atia’e le nuu, ma le aai o Ieruselema, auā o le Atua lava na te liua le loto o le tupu i lona mana, ona tatala ai lea o ia e alu. O le uiga lea o ana toe upu lava o lana tatalo. “... ma ia e tu’u mai iā te au ia alofaina i luma o lenei tagata.”

Na iloa e le tupu o Aretaseta le faanoanoa uiga ese o Neemia, ona ia fesili lea i ai pe mafua i se a? ae pe i ai foi se mea e manao ai? Ona tau sao lea i ai e Neemia lona manao, ma talosaga i ai i ni tusi, e le gata mo le momoliina o ia i Iuta; a’e mo ni laau foi mai le togavao o le tupu, mo le fausia o le pa i Ieruselema. Sa talia fiafia e le tupu lona manao, auā ua galue le mana o le Atua i le loto o le tupu, e tusa o le tatalo a Neemia.

### **Uiga o Upu ma Fuaitau:**

- i). kiselu (f.1) - O lo o taua o le masina lona iva lea (Sakaria 7: 1). O lona uiga o Setema i aso nei; ae lē o maua se isi faamatalaga e uiga iā Kiselu.
- ii). “Susana i le maota” (f.1) - O Susana o le igoa lea o le nofoaga matagofie o i ai le maota o le tupu i Papelonia (aai)

### **GALUEGA FAATINO:**

Faavasega mai, pe toe fetuunai mai le mea muamua e oo i le mea mulimuli, tusi tau o le numera o le fuaiupu.

1. “Neemia 1:4-11” - O le vaega tonu lea o lo o fia faamauina ai le tatalo a Neemia, ina ua ia mauaina le tala faanoanoa e uiga i puipui ma pa o Ierusalemā lona aai pele, ona ia;

- i). aioi lea ia faafofoga mai le Atua i lana tatalo
- ii) aioi foi mo se fesoasoani i lona alu atu i le tupu.
- iii) tautino agasala ma sesē
- iv) tatalo ai lea i le Atua
- v) tautino lona paia silsili ese.

Tali: (iv, v, i, iii, ii)

2. O le mea e sili ona taua ma lelei, o lo o tatou iloa mai le fuafuaga o le malaga a Neemia, “o le aofia ai ma le Atua i lana fuafuaga.” O le a se lelei o le aofia ai ma le Atua i le fuafuaga a Neemia?

Tali: O le lelei, ona ua taunuu manuia ai mea uma sa ia manao ma fuafua i ai, ona sa auai le Atua.

3. O le a se aogā mo tatou?

Tali: O le aogā, o le ala foi lea e tatau ona tatou mulimuli ai. A manatu i se mea e fai, mua’i tu’u i le Atua e ala i le tatalo.

**PESE:** Fai sau tatalo i le taeao.

#### **A’OA’OGA:**

- 1. E taua le tatalo. 2. Tu’u i le Atua mea o manatu ai.
- 3. E leai se mea e faigata i le Atua.

#### **TATALO:**

Matou te faafetai tele lava lo matou Tamā i lou alofa, ua matou maua ai lenei Aso Sa i le manuia. Faamagalō mai lo matou le fiafia e feso’otai atu ia te oe e ala i le tatalo. Matou te tatalo ia manuia tamaiti uma lava o le lalolagi i lau tausiga, faamanuia ou tagata ma ia fiafia e mafuta atu ia oe i le tatalo. Amene.....

### **MANATU TAIALA O SETEMA MA OKETOPA: O LE TALA LELEI MAI LE ATUA E SUIA AI LE OLAGA O LE TAGATA**

O lenei lava masina, ua masani ona faamanatuina ai le oo mai o le Tala Lelei i o tatou laufanua. O le tala i le alofa o le Atua, e ala i lona Alo Pele, na ia faia le faaolataga mo le lalolagi, e ala i lona maliu ma lona toetu. O le taunuu o le Talalelei, ua suia ai le soifuaga ma le olaga masani sa ola ma soifua ai lo tatou atunuu. O mataupu o lenei masina e faatatau lea i nisi foi na avea lo latou faalogo i le finagalo o le Atua ma le afio mai o Iesu na suia ai o latou olaga.

**ASO SA: 6 SETEMA 2015**

**MATAUPU: E TATAU ONA SALAMŌ**

**SINI:** Ia a’oa’o le vasega ia malamalama e tatau ona salamō mai agasala.

**TUSI FAITAU:** Iona 3: 1 – 10

#### **FESOASOANI MO FAIAOGA:**

O Nineva, o le aai lea na auina i ai e le Atua Iona e talai, ua toe fagafulu po ona faaumatia lea, ona o a latou agasala. I le taimi muamua e lei alu Iona, ae ua sola i Tasesa. O le faalua ona auina o Iona, na alu ai loa o ia ma faatino le finagalo o le Atua.

Na tau atu e Iona i le nuu o Nineva ua toe fasefulu po ona faaumatia lea o i latou. O se nuu tele Nineva, e tusa ma le tolu aso e savalia ai. Peitai, o le aso muamua lava na savali ai Iona ma alaga i le feau mai i le Atua, o le aso foi lea na talitonu ai tagatga o Nineva i le Atua.

Ua tala’i la latou anapogi, ua oofu i le ie talatala tagata uma. E oo lava foi i le tupu o le nuu, o le taimi lava na ia maua ai le talaiga a

Iona, na ia tulai ai mai lona nofoalii, ua tuu ese lona ofu tele, ae ufitia o ia i le ie talatala, ma nofo i le lefulefu. O faailoga vaaia ia o le tagata ua salamō moni, lea ua faia e le tupu ma tagata o Nineva. Ua faia le anapogi, oofu i le ie talatala, nofo i le lefulefu, le aai ma le feinu, o tagata atoa ma manu. E le gata i lea ae ua alalaga i le Atua ma faasaga ese i o latou ala leaga ma le faamoemoe, atonu e liliu ese ai le toasa o le Atua.

O le iuga o le tala na faasaoina le nuu o Nineva ina ua salamō le Atua ma liliu ese ai lona toasa ona o galuega na faia e tagata o Nineva. O le mea taua, o lo latou faalogo ma talia le talaiga a Iona, ua faasaoina ai i latou.

### Uiga o Upu

- i). anapogi - faatigaina o le tino ona o le agasala ia faamagaloina.

### GALUEGA FAATINO:

- i) Ia fai se faatinoga o le tala.
- ii) Filifili se tamaitiiti e fai ma Iona, o se isi tamaitiiti e fai ma tupu ae fa'aaoga le isi vaega e fai ma tagata o le nuu.
- iii) Pule lau susuga pe e te faatinoina le vaega a le Atua, pe tofia iai se isi o le vasega.

**PESE:** Tulei ese, tulei ese, tulei ese  
Avega mamafa uma o lou agaga  
Tulei ese, tulei ese, tulei ese  
Avega mamafa uma o lou agaga  
O agasala uma lava  
E goto ifo i le palapala  
Tulei ese, tulei ese, tulei ese  
Avega mamafa uma o lou agaga.

### A'OA'OGA:

1. E alofa le Atua i le tagata e salamō faamaoni.
2. Ia talai atu le finagalo o le Atua i isi tagata.
3. A sesē ia iloa ona salamō ma faamaulalo i le Atua.

### TATALO:

Faafetai i le faamaoni o lou alofa le Atua mo i matou le fanau. Faamagalalo lo matou faalogogatā, ma galue mai lou Agaga ia matou iloa ona salamō i o matou leaga. Amene.

.....

**ASO SA: 13 SETEMA 2015**

**MATAUPU: FAALOGO MA TALITONU**

**SINI:** Ia a'oa'o le vasega ia malamalama e taua le faalogo ma talitonu i le Atua.

**TUSI FAITAU:** Iosua 2: 8 – 14

### FESOASOANI MO FAIAOGA:

O Raava, o le fafine talitane, o lona nuu o Ieriko. Sa ia agalelei ma fesoasoani i sipai Isaraelu e toalua, lea na auina e Iosua e o e matamata i le nuu o Ieriko. O le galuega alofa na faia e Raava i tagata Isaraelu nei e toalua o lona faalafiina lea i lona fale ina ua saili mai e le tupu o Ieriko.

Manatua o lea ua sauni Isaraelu e ulufale atu i Kanana. O lo o nonofo i le isi itu o le Ioritana e faafeagai ma Ieriko. A'o le'i taunuu atu Isaraelu ua leva, ona oo atu tala i lo latou matautia, e ala i lo latou

faatoilaloina o tupu e toalua o sa Amori o Sekono ma Oko. Ae le gata i lea o galuega matautia ma le mamana na faia e le Atua, e pei o le faamateina o le sami. O nei mea uma, ua logo tala i ai tagata o Ieriko ma ua avea ma mea ua fefefe ma palaaai ai ia Isaraelu.

O le mafuaaga tonu lava lea, na agalelei ai le fafine o Raava i tagata Isaraelu ia e toalua. Ua ia tautino foi i tagata e toalua o le Atua o Isaraelu, “o le Atua o le lagi i luga, ma le lalolagi i lalo nei.” (f.11).

Ua lava ia upu e faailoa ai, ua ia talitonu i le Atua ona o tala na ia faalogo i ai. O lana talosaga, ia agalelei mai nei tagata Isaraelu, ia te ia ma lona aiga. Ia faaolaina lona tamā, o lona tinā, o ona tuagane ma ona uso atoa ma tagata uma ua ia te i latou mai i le oti.

Ua iloa lelei e Raava, e le faasaoina Ieriko i le matautia o le nuu o le Atua. Sa talia lelei lana talosaga e sipai ma tautino i ai, “O maua ola e sui ai ia te outou i le oti, pe afai tou te le ta’ua la maua nei feau.”

Sa faatonuina Raava ina ia nonoa le maea fua mumu i le faamalama o lona fale. Na tuutuu ifo ai i laua ina ua toe foi e fai ma faailoga. O le iuga o le tala na faasaoina Raava ma lona aiga, ona o lona talitonu ina ua faalogo i le tala i le Atua.

### Uiga o Upu ma Fuaiupu:

- i). Ua matou faalogo i ia mea - O le faalogo o tagata Ieriko  
ona liu suavai ai lea o i le matautia o Isaraelu ma lo  
loto (v.11) latou Atua, na oso ai le fefe  
ia te i latou ua leai se faa-  
moemoe.

### GALUEGA FAATINO:

Tali mai i Fesili

1. O fea na nana ai e Raava tagata Isaraelu ia na o atu i lona fale?

Tali: O le pito i luga o le fale.

2. O le a le mea e te iloa ai le fefefe o tagata Ieriko ia Isaraelu?

Tali: Ona o upu a Raava e faapea “ua oo mai lo outou matautia ia te i matou, ma ua faavaivaia ona o outou o i latou uma e nonofo i le nuu.”

3. O a ni upu a Raava e iloa ai ua talitonu i le Atua?

Tali: (vs 11) “... aua o le Alii lo outouAtua, o le Atua ia i le lagi i luga, ma le lalolagi i lalo nei.”

4. O le a se mea na talosaga ai Raava i tagata Isaraelu?

Tali: Ia faasaoina o ia ma lona aiga.

5. Pe na talia e tagata Isaraelu le manao o Raava?

Tali: Sa talia, pe afai na te le ta’uina le la feau.

**PESE:** Faalogo ma Usita’i

### A’OA’OGA:

1. Ia faalogo ma talitonu i le Atua.
2. Ia agalelei i tagata ese.
3. Ia tauitu le lelei i le lelei.

### TATALO:

Faafetai i lou alofa le Atua, ua matou aulia manuia mai ai lenei Aso Sa. Faamagalalo o matou sesē, ma galue mai lou Agaga ina ia matou faalogo ma lagona lou fetalai mai. Amene.

.....



**ASO SA:** 20 SETEMA 2015

**MATAUPU:** A VALAAU MAI, ALU LOA

**SINI:** Ia a'oa'o le vasega ia malamalama a valaaaina loa i se tiute ma se galuega alu loa e fai.

**TUSI FAITAU:** Mataio 4: 18 – 22

### **FESOASOANI MO FAIAOGA:**

Ina ua amata le galuega faaola a Iesu i le lalolagi, sa ia filifilia nisi latou te galulue faatasi lea e i ai ona so'o. E maluu atu Iesu, o lo o galulue nei taulelea, e le o nofonono. O i latou o ni tagata faifaiva. O a latou galuega ia sa fai e fesoasoani ai ma tausi ai o latou aiga. O lona uiga, sa faamoemoe i ai o latou aiga ma matua i nei tama.

E oo mai Iesu e latalata i le vai o Kalilaia ae ia iloaina ai Peteru ma lona uso o Aneterea, o lo o lafo lo la upega i le vai. Ona valaaui lea o Iesu ia te i laua "Ina mulimuli mai ia ia te au, ou te faia oulua ma faifaiva i tagata." O le taimi lava lea n tuu ai loa e i laua lo la upega ae mulimuli ia Iesu. Ua le toe popole i le upega, o le mea aoga mo le aiga. Ua le manatu foi sei logo matua po o le a so la manatu, ua leai lava. O lea ua tuua mea uma ae alu loa i le valaaui ua valaaui ai.

E faapena foi ia Ioane ma Iakopo sa fai masae o lo latou upega ma lo la tamā. O le taimi lava na valaaui ai Iesu, na tuua ai loa mea uma ae mulimuli ia Iesu. Tamaiti, e tele se a'oa'oga mo i tatou o le mataupu i leni taeao. O le a lava se feau po o se galuega e filifilia pe tofia oe e faia, aua le toe faatali ae alu loa e faatino.

### **Uiga o Upu ma Fuaiupu:**

- i). (f.19)...”Ina mulimuli mai ia - Ua valaauiina e Iesu Peteru ia te au, ou te faia oulua ma ma Aneterea e fai ma fai faiva ma fai faiva i tagata.” e fagota mo agaga o tagata ae

le toe fagota mo ni i'a.

**GALUEGA FAATINO:** Faatumu Avanoa

Ia fa'aaoga upu o lo o i le lisi e faatumu ai avanoa:

Upu: mulimuli, fai faiva, savali, Kalilaia, vai, tuua, upega, vaa, tama, Simona, Peteru, Aneterea.

1. Ua \_\_\_\_\_ ane Iesu e latalata ane i le \_\_\_\_\_ o \_\_\_\_\_.
2. “Ina \_\_\_\_\_ mai ia ia te au, ou te faia oulua ma \_\_\_\_\_ i tagata.”
3. Ona la \_\_\_\_\_ loa lea o laua \_\_\_\_\_ ae mulimuli atu ia te ia.
4. O \_\_\_\_\_ ua igoa ia \_\_\_\_\_, ma \_\_\_\_\_ lona uso.
5. Ona la tuua loa lea o le \_\_\_\_\_ ma lo la \_\_\_\_\_.

Tali:

1. savali, vai, Kalilaia.
2. mulimuli, fai faiva.
3. tuua, upega.
4. Simona, Peteru, Aneterea
5. vaa, tama.

**PESE:** Ua ou filifili e mulimuli ia Iesu.

### **A'OA'OGA:**

1. A valaauiina loa i tatou i feau ma galuega alu loa..
2. E filifilia i tatou uma e le Atua i feau ma galuega.
3. Mulimuli ia Iesu ma le loto atoa.

### **TATALO:**

Faafetai ua matou aulia manuia mai leni Aso Sa, faamagalo mai matou le fanau. Matou aioi atu, galule mai lou Agaga i o matou loto, ina ia matoulagona ma vave tulai i lou fetalai mai. Amene.

**ASO SA:** 27 SETEMA 2015

**MATAUPU:** O LE FAATUATUA E FAAILOA I GALUEGA

**SINI:** Ia a'oa'o le vasega ia malamalama o le ola faatuatua, e faailoa i galuega e fai.

**TUSI FAITAU:** Galuega 4: 32 – 37

**FESOASOANI MO FAIAOGA:**

E uiga ese le manaia o tala i le amataga o le Ekalesia. Aua e ui ina fetai ai ma faigata o le sauaina ma le taumafai o nisi e taofi le tupu a'e o le Ekalesia ma le faasalalauina o le tala ia Iesu, ae e le'i avea lea ma mafuaaga, na taofia ai le faatuatua ma le talitonu o i latou ua liliuina i le tala ia Iesu.

O tagata ua faatuatua ma talitonu i le tala ia Iesu ua tasi le loto ma le manatu. Ua tuu faatasi a latou mea toino, ua le manatu se tagata e faapea o lana meatotino lea. O ia e pule ai, o le faailoga o le faatuatua ua moni, lea ua ofo atu ai o latou tamaoiga ma mea totino mo le au uso ma le talalelei. Ua faatau fanua ma fale, o tupe e maua mai ai e tuuina uma atu i le au aposetolo. O tupe ia, e tufatufa i tagata uma, e faatatau i le tagata ma lona mativa, ma ua avea ma mea ua manuia ai i latou uma, ua leai se tagata e mativa.

O le faatuatua ua fa'aalia i galuega ua faia. Ua leai se manatu faapito mo ia ma lona manuia, a e ua faasafua ona manuia ina ia manuia ai isi tagata, ae maise le talalelei ia Iesu.

**Uiga o Upu:**

- i). tu'u tele - tu'ufaatasi.
- ii). molitino - ua lauga atu ma a'oa'o atu.
- faailoa atu

**GALUEGA FAATINO:**

Tali mai i le Sa'o po o le Sesē

1. Sa eseese loto ma manatu o tagata faatuatua i le taimi o le ulua'i Ekalesia.

Tali: Sesē (sa tasi lava le loto ma manatu)

2. O le manatu sa i tagata faatuatua, e pule lava le tagata ia i ana mea totino.

Tali: Sesē (ua tuu tele a latou mea uma)

3. Na avea le tuu faatasi o mea totino a tagata faatutua ma mafuaaga o le leai o se tagata e toe mativa.

Tali: Sa'o

4. O le tufatufaina o mea na maua mai i oloa na faatauina sa faatele lava tagata e tele a latou oloa.

Tali: Sesē (Sa faatatau i le mativa o le tagata)

5. O le au aposetolo sa faasoasoina le tau o oloa na maua.

Tali: Sa'o

**PESE:** Alofa o se mea e te faasoa atu  
Faasoa atu, faasoa atu  
Alofa o se mea e te faasoa atu  
Ae toe foi mai i se aso.

Faatusaina i se tupe itiiti  
Taofi mau e leai se faasili  
Tufa atu ma faasoa atu  
Ae toe foi mai i se aso.

## A'OA'OGA:

1. E iloa lo tatou faatuatua i galuega tatou te faia.
2. Ia alofa atu i tagata matitiva.
3. Foa'i ma le loto malie mo le Atua.

## TATALO:

Faatumau atu pea le viiga ma le faafetai i lou suafa lo matou Atua e. Faamagalō mai matou lau fanau i ō matou sesē; ma a'oa'o mai ina ia matou fiafia e galulue ona o le talitonu iā oe. Amene.

.....

## ASO SA: 4 OKETOPA 2015

### Tala Lotu Tamaiti.

Faamatala 1: O le maualuga o le tulaga i totonu o se Sosaiete, e faigata ai ona talia se fautuaga mai tagata lautele. Peita'i ua tatou mautinoa, e leai lava se e atoatoa i lalo o le la. O le faamoemoe, ia amanaia ma utagia se leo faatauvaa, e ala ina ua faamaulalo o tatou loto. O le tala ia Naamanu le ta'ita'i au a le tupu o Suria ma le perofeta o Elisaia.

Naamanu 1: Ua ou maua le malosi e faatoilalo ai Israelu, e faatuatua a'u e lo'u Alii, ua manuia foi lo'u nuu ona o a'u...Ae toe pau lava lenei o le faalavelave, e le te'a ese ai le lepela o lo'u tino.

Faamatala 2: O Le sa aumai faatagata o tauaina e Suria mai Samaria, o le faatauvaa lea na maua ai le fofo o le mai o le Alii o

Naamanu. Ua iloa le perofeta o Elisaia, ma ua saili loa e Naamanu mo se faamalologa o lona mai lepela.

Naamanu 2: Auauna faagutu kariota ma omai loa tatou o lea ua ou iloa le tagata o le Atua.

Auauna 1: O ai le igoa o le tagata

Naamanu 3: O Elisaia

Auauna 2: Manaia ae tapena ni ou aluga nei avatu taofia oe i le falema'i a le tamaloa.

Auauna 3: Ia ma ni lavalava nei tei ua avatu faataele, auā o le taele a le tali o ia ituaiga mai.

Naamanu 4: E leai e le taofia a'u o lea ou te malosi.

Auauna 1: E ese a le malosi, ese le pulepule o le pa'u.

Naamanu 5: Vaai e ese le Taitai, ese le auauna. Fai lelei mai tou saunoaga.

Auauna 2: Oi..Ia lau Afioga e, oso loa i luga ma pipii mau nei tei ua e pau.

Naamanu 6: Auauna, alu se isi i le fale po o i ai Elisaia sei sau sei faamalolo lo'u ma'i.

....auauna – tuitui le faitoto'a...

Auauna 3: Malie lau Susuga, na matou omai ma le matou ma'i o lo o faatali mai i fafo...

Elisaia 1: Ao lea le mea ua le sau ai i le fale..

Auauna 1: O la e faimai pe mafai ona e susu atu i fafo...

Elisaia 2 : O le a le ma'i...  
 Auauna 2: O le ma'i lepela...

Elisaia 3: Ia alu e fai iai, ua ou faiatu – E alu e taele faafitu i le vaitafe o Ioritana.

Auauna 3: Lo'u Alii e, fai mai le perofeta e te alu e te taele faafitu i le vaitafe o Ioritana.

Naamanu 7: Ea!Ea!..kua le mafaufau lena perofeta. E fai ana faatonuga ae le susu mai i fafo..

Auauna 1: Se malie lou loto...

Naamanu 8: Leai!!!! O iloa e le alii la o a'u o le taitai au.

Auauna 2: Se...Lo'u matai e...

Naamanu 8: Ae sei vaai i le tele o le mau vaitafe mananaia, ae sei fai mai lava ou te alu i lena vaitafe pala.

Auauna 3: O lena e te fia malolo, amanaia le faatonuga a le perofeta, faapea le tuualalo a au auauna.

Naamanu 9: A'e o ai e fia malolo pe a fai e le sau i fafo ma le fale...A o ai le perofeta??? a o ai foi outou???

Auauna 1: Lo'u Alii e, ana fai atu e le perofeta se mea tele ia te oe, e te le faia ea ina ua ia fai atu ia te oe, e te taele e te mama ai??

*Faatino le tofu faafitu i le vaitafe o Ioritana....*

## **A'OA'OGA:**

O le amanaia e tatau mo oe, o a'u ma i tatou uma. Ioe...ana le amanaiaina e Naamanu le leo faatauvaavaa mai ana auauna. E le mafai ona faamamaina lona ma'i lepela. O se feau foi lea mo tatou i lenei aso faapitoa mo matou le fanau. Ia tatou iloa ona amanaia so o se tagata. Tamā, ia amanaia se fautua a tinā. Tinā, ia amanaia se tonu faatauvaavaa a tamā. Fanau ia matuā amanaia le upu e taugologolo atu a matua. Amanaia foi le leo o fanau. O le amanaia e mafua ai ona leai se feeseeseaiga i totonu o aiga, nuu ma le Ekalesia. A ua fusia i le fealofani le soifua auauna ma le ola tautua i le Atua.....

.....

**ASO SA: 25 OKETOPA 2015**

**MATAUPU: AUA E TE MĀITAUINA FA'ALETONU O ISI**

**SINI:** Ia a'oa'oina le fanau ia malamalama - e ui e taua le matau o faaletonu o se mea, ina ia maua ai ni suiga fou mo le lelei. A ia mautinoa e i ai foi itu e le lelei ai le vaavaai fua o faaletonu o le isi.

**TUSI FAITAU:** Mataio 7: 1 – 5

## **FESOASOANI MO FAIAOGA:**

O le amio faaletagata masani lava ia e aofia ai tagata uma – “E ola matau ma faamasino”. O se natura lea e faigofie ai ona matau gaiioiga o lo o faia ma tala o lo o tautala i ai se isi tagata. O le matau lea e mafua ai ona fai le faamasinoga. Peita'i o le molimau a Mataio e lē o le faamasinoga lea ina ia faasala ai le tagata, a o le faamasinoga lea e

ala i tu'uaiga ma ni manatu e tete'e ai i lea tagata. O le isi matauga o faaletonu e fai faalilolilo, po o le fai lea e aunoa ma le iloa e le isi tagata.

O le isi masani o le lē manatu ifo ma fetu'unai muamua. Auā o le mea moni e i ai taimi tatou te leiloa ai o tatou lava sese ona o le upu masani lava ia – “*E tonu a le tagata i ona manatu*”. O le ala foi lea e ala ai ona iloa gofie e le isi faaletonu o le isi, ona e eseese uma manatu ma lagona. A o le mea mautinoa e pei ona molimau le Tusi Faitau – O le mea e te faia i le isi tamaitiiti, e toe fai mai e le isi tamaitiiti ia te oe. O le vaivaiga lea faaletagata. O le lē manatu mamafa o le mataua fua o faaletonu o le isi, e toe foi mai e ala i matauga ma manatu o isi foi tagata ia te ia.

O le mataupu e 7 o lo o fa'aauau mai ai upu o le lauga a Iesu i luga o le mauga, o lo o amata mai i le mataupu e 5 i lana lauga faa-amuia. O le vaega sa faitauina o lo o auga lava i le mataupu lea o le faamasino atu, fuaina atu, po o le vaai i si fasi laau i le mata o lou uso. O le faamamafa ina ia 'aia lava nei fai ma masani a le fanau lea mea o le matau fua o faaletonu o isi.

O le fanau foi e le toe tau faailoaina, ua pei se mea pueata e latou te matau ma pu'e gofie i amio ma faamatalaga. E faapena foi le uiga matau o nisi o lo o i ai i le motu o tagata o lo o lauga i ai Iesu. E pei o tagata ia ua ta'ua o le Au Faresaio, Tusiupu. E i ai foi le manatu o nisi o i latou ia o lo o faatatau i ai upu ia o le lauga a Iesu, leaga o lo latou uiga lea o lo o mulimuli ai iā Iesu, e vaavaai ma matau ni mea e faaletonu ai le galuega talai a le Alii Faaola. A o le feau o le mataupu o lenei taeao, ua mautinoa le isi lea uiga o fanau e ola matau. A ia matau tau o mea lelei, ae 'aia le mafuli e matau faaletonu o le isi tamaitiiti, e aunoa ma lo tatou manatu muamua ifo i ai tatou lava.

### Uiga o Upu ma Fuaiupu:

- i). faamasinoina: (*I le fa'aaogaina i le tusi faitau*) – o tuuaiga, tusingilima, o ni aga e afaina ai le loto o le isi uso.

- ii). utupoto - vaega uliuli o le mata e mafua ai ona manino le vaai.
- iii). fuaina - faia agai i le isi tagata, o se mea e te avatu.
- iv). fasi laau - faatusa o se mea e paia ai le mata.

### GALUEGA FAATINO:

E fautuaina le faia o se faatinoga e atagia ai le uiga masani lea o le mataua o faaletonu o le isi e ala i upu ma faamatalaga. O ni amio e pei e faatauva'a o uiga masani o fanau, a o lo o iloa ai uiga le o le mataua o faaletonu o isi. Ua avea ai ma tuuaiga ma mea e faatupu ai le vevesi i le va o fanau faapea foi e matutua.

**PESE:** Tulei ese, Tulei ese, Tulei ese  
Avega mamafa uma o lo'u Agaga  
O agasala uma lava, e goto ifo le palapala  
Tulei ese, tulei ese, tulei ese  
Avega mamafa uma o lo'u Agaga

### A'OA'OGA:

1. 'Aua le tuuai le leaga i nisi
2. O le mea e te faia i le isi, e toe fai mai e le isi ia te oe.
3. Ia maua le loto faamagalalo

### TATALO:

Le Atua e lo matou Tama, o Lau Afio e te faamasino i o matou tagata taitoatasi. Faafetai i lou tausia pea o i matou, manuia lau fanau e ala i le aao ta'ita'i o lau Afio. Matou tatalo ina saga faamalamalama e le Agaga lo matou ola tusingilima ma le tuuina fua o le leaga i nisi. Ua matou fiafia e matau faaletonu o isi, a ua matou le manatu ifo lava ia i matou. Aumaia le toto o lou Alo pele o Iesu keriso. Ia magalo ai lau fanau. Fesoasoani mai lau Afio i le alu o lau Tala Lelei o lenei aso. Ua matou tatalo e ala iā Iesu Keriso lo matou Alii ma lo matou Faaola... Amene. ....

**MANATU TAIALA O NOVEMA & TESEMA:  
NA FAIA E LE ATUA MEA UMA INA IA MATAGOFIE**

Ua tele mala faalenatura ua aafia ai le tele o atunuu o le lalolagi, e oo lava i si o tatou atunuu. O afa, galulolo, afi, e oo lava i le suiga o le tau i le vevela. O le fesili e mafua i se a? O i ai ea le Atua i totonu o nei suiga? Sei o tatou nonofo te isi ifo i lalo ma toe to manatu i le alofa o le Atua, ona toe mafaufau loloto lea, pe lē o tatou lava le mafuaaga o ia mea.

**ASO SA: 1 NOVEMA 2015**

**MATAUPU: O LE MALAMALAMA MA LE POULIULI**

**SINI:** Ia a’oa’oina tamaiti o le malamalama ma le pouliuli na faia e le Atua. O le Atua foi na faaigoaina le malamalama o le ao, a o le pouliuli o le po.

**TUSI FAITAU:** Kenese 1: 1 - 5

**FESOASOANI MO FAIAOGA:**

O le foafoaina e le Atua o le lalolagi na ia mua’i faia ai le malamalama ma ia faaigoaina ai o le ao. O le oso ae o le la, ma suluia ai le lalolagi, o se taimi sili lea ona taua i le ola o le tagata. E le gata o le faailoga o le ola faafouina ae ua fai ma taimi e alafa’i ai le tagata e faagasolo feau ma galuega o le aso. Afai la, o le malamalama na faia e le Atua i le uluai aso, e le gata o le taimi lea e galue ai le tagata, a ia ola foi le tagata i le malamalama o le Atua.

E galue le tagata ae ao foi ona malōlō, e pei foi ona malōlō mai le Atua i ana galuega. O le pouliuli lea ua aveva ma po, o le oo mai lea o le pogisa, sei taoto ai le tagata ina ia mafuta ai lona agaga ma lona mafaufau i le Atua, e maua ai le malosi faafouina mo galuega o le aso fou. E lē leaga le po, aua o le taimi malōlō lea o le tagata, e pei ona

tatou ola ai nei, ae ia iloa foi o le pouliuli po o le po, na faia foi e le Atua. O le ao ma le po, o taimi taua ia na faia e le Atua mo le tagata e galue ai e fai mea lelei. O le sesē ma le ola soona fai o le tagata i le fa’aaogaina o taimi taua na aumai e le Atua. Ua mafaia ona tutupu le tele o faafitauli i le ola o le tagata. Aua nei suia e le tagata le taua o taimi na faia e le Atua e galue ma malolo ai.

**GALUEGA FAATINO:** Tali Fesili:

1. Aiseā e taua le malamalama i le ola o le tagata?

Tali: Taimi e galue ai.

2. O ai na faia le ao ma le po?

Tali: O le Atua.

3. E leaga le po?

Tali: Leai

4. Aiseā?

Tali: Auā na faia e le Atua.

5. E faapefea ona faia e le Atua le malamalama?

Tali: Na ona fetalai lava o le Atua. “Ia malamalama ona malamalama ai lea.

**A’OA’OGA:**

1. Ia faataua taimi na aumai e le Atua.

2. O le ola i le malamalama o le Atua, o le faia lea o mea lelei.

**TATALO:**

Faafetai tele lo matou Atua i lou alofa faapalepale mai iā matou le fanau, e le gata o lenei aso, a o aso uma o le ola. Faamagalalo lo matou fialia i le pogisa. A’oa’o mai ina ia matou fialia i lou malamalama. Amene.

.....

**ASO SA:** 8 NOVEMA 2015

**MATAUPU:** UA VAVAO E IESU LE MATAGI MA LE VAI

**SINI:** Ia a’oa’oina tamaiti po o le a lava le vevesi ma le tele o faafitauli e tutupu mai e maua le toamalie, pe a moni lo tatou faatuatua iā Iesu Keriso.

**TUSI FAITAU:** Mataio 8: 23 – 27

### **FESOASOANI MO FAIAOGA:**

O le solo lelei o le ola o le tagata e faamaualuga ai i lona malosi, ma manatu ai, ua saogalemu lona ola i mea ua ia maua. Ua fa’aaogā lona poto ma lona atamai, e fai ma talipupuni ua manatu e folau ai vaa o manu. Ae a oo mai tigā ma faafitauli, ua lē gafatia e lona malosi, ona tau saili lea, po o ai e maua ai se fesoasoani. “Alii e, faaola mai, a matou fano.”

Ua vevesi le au so’o ma popole ina ua afatia i le matagi ma osofia le va’a i peau. Ua fafagu e le au so’o Iesu, ao tofā o ia, ua silafia e Iesu le popole ma fefe ua fememea’i ai ona so’o. Ua leai se faatuatua, o le ala mai o Iesu ma vavao i le matagi ma le vai, na maua ai le to’a malie i loto popole ma le fefe o le au so’o. E le gata ina tea le loto popole o le au so’o, a o le ata vaaia foi lea o le pule aoao a le Atua i mea o le natura. I totonu o matagi ma afa, o peau malolosi o faigatā ma tigā o le olaga nei, o lo o i ai le aao faaola o le Alii, e malu ai o tatou loto fememeai ma le lē mautonu.

### **Uiga o Upu:**

- i). osofia - ua ova le suasami i totonu o le vaa.
- ii). tofā - moe.
- iii). matatau - fefefe ma lē mautonu

- iv). malū - toa/lē gaoiā
- v). to - agi malosi mai.

### **GALUEGA FAATINO:**

#### **Tali Fesili:**

1. O fea le nuu e i ai le vai lea na agi ai le afa?  
Tali: O Kalilaia
2. Aisea na fafagu ai e le au so’o Iesu?  
Tali: Ua fefe ma popole.
3. “Outou e faatuatua itiiti” O ai e faasino ai upu ia a Iesu?  
Tali: O le au so’o
4. E faamaoni le ola faatuatua o le au so’o?  
Tali: Leai.
5. Aiseā na taufaiifo ai le au so’o?  
Tali: Ona ua faalogo le matagi ma le vai iā Iesu.

### **A’OA’OGA:**

1. O Iesu e maua ai le filemu.
2. O le faatuatua e mafaia ai mea uma.
3. E leai se fefe e maua ia Iesu Keriso.

### **TATALO:**

Fai atu le viiga ma le faafetai i lou suafa le Atua e, ona o lou alofa ma lou faamaoni. Faamagalo lo matou palaaai. A’oa’o mai ina ia mausali lo matou faatuatua ia oe. Amene.

.....

**ASO SA: 15 NOVEMA 2015**

**MATAUPU: O LE TAPUAIGA I LE ATUA LE OLA FAITAULAGA**

**SINI:** A’oa’o tamaiti ia latou iloa, o le tapuaiga mai i le Atua, o le ofoina atu atoa lea o oe e ala i lou loto talitonu ma le faatuatua e fai ma au taulaga ia te Ia.

**TUSI FAITAU:** Kenese 12: 1 – 13 (Faiaoga)  
Kenese 12: 5 – 13 (Vasega)

**FESOASOANI MO FAIAOGA:**

E masani tatou i le tala lea i lona faaulutalaina e faapea, “Ua ave Isaako e osi ai le taulaga.” O le tala lava lea e tasi, ae ua suia le faamamafa ua tuliloa e pei ona taua i le mataupu o lenei Aso Sa, “O le Tapuaiga i le Atua le ola faitaulaga.”

Sa faatonu e le Atua Aperaaamo e ave Isaako lona atalii pele e osi ai le taulaga. O se tofotofoga faigata ma le le faigofie lenei manao. Peitai, o Aperaaamo lava ia e pei ona tatou iloa ma tautala ai, o le tagata faatuatua i le Atua. O le tagata e talitonu atoatoa i le Atua ma lona alofa, o le ala foi lena o lona le te’ena o le poloaiga a le Atua, e ui ina matuitui ma faigata.

O le faatuatua o Aperaaamo i le Atua, o le ofoina atu atoa lea o lona loto talitonu ia te Ia, i so o se mea o finagalo ai le Atua mo ia. Ma e ui lava foi ina faigata lenei manao, ae na sauni lava Aperaaamo i lona loto atoa e fai le taulaga, e pei ona faatonu mai. O le tolu o aso talu ona alu le solo, ae vaaia loa e Aperaaamo le nofoaga na poloai mai ai le Atua e osi ai le taulaga, ona ia vaoia lea o tauleleia i lea mea, ae o na o laua ma lona atalii. Fai mai lana upu, “Talu atu ia iinei ma le asini, a o a’u ma le tama ma te o i o e tapuai ai.” O le osiga taulaga, o le tapuaiga

lava lea i le Atua, e ala i le loto ua talitonu atoatoa i le Atua. Sa fesilisili lava le atalii i lona tama e uiga i se mea e osi ai le taulaga, ae o lo o iloa i le tali a Aperaaamo. O lo o soifua le Atua, e le mativa i se mea, ma na te le faia foi se leaga i le o faatuatua ma faalagolago faamaoni ia Ia. O le taimi o le osiga-aulaga e ala i le loto ua malie ma atoa i le mea o finagalo ai le Atua. O le taimi tonu lava lena, na fa’aalia ai le talia e le Atua o le loto o Aperaaamo, ma suia ai loa Isaako i le mamoe e osi ai le taulaga.

**Uiga o Upu ma Fuaitau:**

- i). fa’aafu (f.9) - fa’a-faapusa (fetu’unai’i i le tulaga e mumū ma ola lelei ai)
- ii). polo (f.10) - naifi.

**GALUEGA FAATINO:**

1. Fai se faatinoga pu’upu’u o le tala sa faitau nei ma faamatala.
2. Fai foi e outou ni fesili e fetufaai ai, e iloa ai ua malamalama tamaiti i le mataupu.

**PESE:** 70

**A’OA’OGA:**

1. Tapuai i le Atua i le loto faamaoni.
2. O le loto faamaoni o le taulaga sili.
3. E usita’i Isaako.

**TATALO:**

Faafetai i lou alofa le Atua ua manuia ai i matou uma. Faamagalalo lo matou le au faatuatua ia te oe. Alofa mai ia te i matou ina ia matou fiafia e tapuai i le loto faatuatua ia te oe, ma avea ma ala e te fia silasila ai i o matou tagata. Amene.

.....



**ASO SA:** 22 NOVEMA 2015

**MATAUPU:** UA VAELUAINA LE SAMI ULAULA

**SINI:** A’oa’o tamaiti ina ia latou iloa, o le vaeluaina o le sami ulaula, o le vavega e le gata ina iloa ai e Aikupito le silisiliese o le Atua; a’o le faamoemoe maualuga, ia lavea’iina ma faasaoina Isaraelu i le alofa o le Atua.

**TUSI FAITAU:** Esoto 14: 15 – 22  
**FESOASOANI MO FAIAOGA:**

O le tala ua tatou iloa ma masani ai, e uiga i le o ese o Isaraelu, e le mafai ona sosola, na o le fēsēta’i solo lava i le vao, auā e le malamalama i le laueleele. Peitai, e leai se mea e pogisa i le Atua, le na fai ma faasino ala i le malaga a Isaraelu.

Na iloa ane mulimuli e Farao, e le o ta’asē Isaraelu i le vao, ua òese moi lava. Na vave ona toe liliu le loto o Farao, ma faatonu lona ona tagata, latou te ò e tuliloa Isaraelu. Le tuliga lea na tau i le sami tele, (sami ulaula) ona faaletonu ai lea o Isaraelu, ua fefe ma atuatuvaile. Ua le mafai ona toe foi i tua o lo o tuliloa mai latou e Aikupito, a o lea ua lumafale i le moana e le mafai ona feausi. O i tonu lea ua mānu a’e ai loa la tatou mataupu o lenei Aso Sa, “**Ua vaeluaina le sami ulaula.**”

E le’i lilo i le Atua le atuatuvaile o lona nu’u, atoa foi ma le ita o Aikupito ia Isaraelu. O lea na fetalai atu ai le Atua ia Mose, “Faaloaloa lona lima i luga o le sami, ona faatupu lea e le Atua le matagi malosi e vaelua ai le sami, ua aliali le ilititai.” Sa faatonu foi Mose e le Atua e fai i le nuu, “Ia latou ò atu pea ia”, ona faapenā lava lea ona fai. Ua vaeluaina le sami ulaula, ona savavali lea o Isaraelu i le isi itu. Sa tautoai atu pea Aikupito, auā e fai o le pogisa o le po, a’o le maa’a foi o le loto o Farao e le mafai ona solomuli. O le vaeluaina lea o le sami ulaula, o le tasi lea vavega na faia e le Atua, na iloa ai e Farao ma Aikupito. “O Ia lava o le Alii.” A o se vavega foi na iloa ai

e tagata uma le silisiliese o le Atua o Isaraelu, ma e tataua lava ona viia o Ia, e i latou uma o ē talitonu ma faatuatua iā te Ia. Peita’i o le faamoemoe autu lava o lenei vaeluaina o le sami tele i le manao le Atua. O lona alofa e faamaoni ia Isaraelu lona nuu filifilia.

### **Uiga o Upu ma Fuaitau:**

- i). ilitai matūtū (f.16) - Vaega eleele o iai le sami i luga. (Vaega pito i lalo)
- ii). faamaa’aina (f.17) - faatumau le ita ma tete’e.

### **GALUEGA FAATINO:**

1. Taliga Fesili. (Tali mai i le “Sao” po o le “Sesē”, fa’aaoga lau Tusi Paia)
  - (i) O le alaga a Mose i le Atua o taua i le f.15, o le faailoga o lona foi faaletonu o i ai, a’e le o se fai mea faalogo i le Atua.  
Tali: Sao.
  - (ii) Ana le faamaa’aina e le Atua loto o Aikupito, semanū e le ò foi e tuliloa Isaraelu.  
Tali: Sao.
  - (iii) Ua laki Isaraelu ona o le aao faaloaloa o Mose, ua mafua ai ona sao.  
Tali: Sesē.
  - (iv) Ana oti Isaraelu i le sami, semanū e tu’uaia i latou lava.  
Tali: Sao.
  - (v) Ana le pogisā le tua o le agelu, ae malamalama lona fatafata, semanū e maua lava e Aikupito Isaraelu.  
Tali: Sesē

**PESE:** 77

**A’OA’OGA:**

1. E leaga le loto maa’a.
2. E silisili vavega o le Atua.
3. Usita’i ma faatuatua i le Atua.

**TATALO:**

Faafetai alofa ma faamanuia mai mo i matou uma lava ma lau fanau i le lalolagi. Faamagalalo lo matou loto maa’a ma le le au faalogo i lou finagalo. A’oa’o mai ina ia matou iloa moni lau afio e ala i le faatuatua. Amene.

.....

**ASO SA:** 29 NOVEMA 2015

**MATAUPU:** UA SILASILA ATU I AI LE ATUA UA LELEI.

**SINI:** Ia a’oa’o ina tamaiti ia malamalama o mea na faia e le Atua mo le tagata, na faia ia lelei.

**TUSI FAITAU:** Kenese 1: 20 – 25

**FESOASOANI MO FAIAOGA:**

I le foafoaina e le Atua o le lalolagi na ia faia ai se siosiomaga matagofie auā le ola lelei ma le manuia o le tagata. O laau, o le vai, o

le laueleele ma le sami, e oo lava i mea ola. O le vaega o le tusi lena e a Kenese o lo o faamatalaina mai ai meaola eseese na faia e le Atua ma vaega o le lalolagi e ao ona nonofo ma ola ai. E tolu la vaega ua vaevaeina ai meaola.

- (1) meaola o le sami – ia, paa, figota ma isi.
- (2) manu felelei ole vanimonimo - segasega, lulu, fuia ma isi
- (3) meaola o le lau eleele – povi, solofanua, puua ma isi.

E ui ina le taua mai ai iniseti po o meaola ninii, ae o lo o aofia uma lava i mea na foafoa e le Atua. O le taamilosaga o le ola (life cycle) e faalagolago lea i le galulue faatasi uma o mea na faia e le Atua. O mea uma nei na faia e le Atua, e ao ona tumau lona taua ma lona lelei. O le mea ua tatou iloa, ua amata ona mou atu le tele o ituaiga meaola sa mafai ona maua i totonu o atunuu eseese o le lalolagi. O le fesili, Aisea?

Ua taumafai le tagata ina ia sili atu mea na te faia nai lo o mea ua foa’iina mai e le Atua. O le moni, e lē mafai ona tumau se lelei o mea e taumafai le tagata e sui mai i mean a foafoa e le Atua. E le gata ina mou atu le tele o mea ola ma manulele, ae ua tele foi faama’i ua tutupu mai i mea ola ma manu. Ae o le aafiaga tele foi ua amata ona aafia ai ma le tagata. O ai la e mafua ai nei suiga lē lelei.

**GALUEGA FAATINO:**

Tusiga Ata – Tusi mai ni ata o meaola taitolu mai i vaega e tolu e pei ona vaevaeina ai meaola na faia e le Atua.

Tali Fesili:

1. O le aso fia na faia ai e le Atua ia meaola?  
Tali: Aso 5

Faaliliu mai i le Gagana Samoa (Translation)

“God made the fish of the sea, birds of the sky and the creatures on earth. God saw it was good. It was the evening and morning of the fifth day.”

**A’OA’OGA:**

1. Ia talia ma le loto faafetai mea ua foa’iina mai e le Atua.
2. E tumau le matagofie o mea na faia e le Atua.

**TATALO:**

Faafetai ua matou aulia fiafia lenei Aso Sa ona o lau tausiga alofa lo matou Atua. Faapalepale mai lo matou valea ma le vaivai. A’oa’o mai ina ia matou iloa lou lelei ma mean a e faia. Amene.

.....

**ASO SA: 06 TESEMA 2015.**

**MATAUPU: TATOU ALALAGA FIAFIA I LE ALII**

**SINI:** Ia a’oa’oina le fanau ia malamalama e ui a i le fiafia o le lalolagi nei, e le faatusaina i ai le fiafia o le Alii. O le fiafia e tatau ai ona ave le viiga i le Alii.

**TUSI FAITAU:** Salamo 98 : 1 - 6

**FESOASOANI MO FAIAOGA:**

O le a le uiga o le Alalaga? (Manaia ae amata i se fesili faapea e aumai ai manatu o le fanau). O se manatu faigofie lava ia, o le Alalaga e mafai ona faapea o le leotetele, malomaloā, pisapisao. Peitai ona o lea ua pipi’i i ai ma le upu *fiafia* – Ua manatu ai o lona uiga o se leotetele ua mautinoa lava o lo o i ai lagona o le fiafia. Ua leotetele pe alalaga ona ua manumalo pe ua taunuu manuia foi se faamoemoe, e leotetele ona ua pepese i le Agaga o le fiafia ma le olioli.

O le Agaga vivii lea o le Fai-Salamo (Tavita) i le Atua, auā ua ia talitonu i le alofa faaola o le Atua o Isaraelu. O lona aao taumatau sa taitai mai ai lona nu’u a o avea ai o ia ma Tupu. O le tulai mai o Tavita e avea ma tupu e lei faigofie, ona sa faalogogata le nuu ma lē tausisi i le feagaiga na osia ma le Atua – (O le a lea feagaiga????)

Peitai e ui i le faalogogata o Isaraelu, ae sa lē mafai ona aveese ai le amiotonu o le Atua. Auā sa i ai pea lana faaolataga ia i latou. O lea ia ua tusia ai upu nei a le fai-salamo, ina ia iloa e Isaraelu le faaolataga lea na aumai e le Atua. Ua toe faafoi e le Atua le tafeaga, ua lautele ona laueleele, ua toilalo foi nuu tuaoi sa latou sii taua ane ia Isaraelu. O le faamoemoe ia latou lagona ma talitonu i le faaolataga lea, ma ia maua le loto salamō.

O le faaolataga lea na auina mai ai e le Atua lona Alo pele o Iesu keriso, ina ia maliu mo a tatou agasala. A ua tatou aga atu i vaitaimi o le fiafia ua alalaga ai le lalolagi ona o le fanau mai o Iesu Keriso. E tatau ai i le tagata ona iloa ona viia ma faafoi le faafetai i le fanau mai o le pepe fou auā o Ia ua tatou maua ai le olioli moni.

**Uiga o Upu ma Fuaiupu:**

- i) alalaga - leotetele, pepese fiafia, pisapisao, fe’ei.
- ii). olataga - maua le ola, faaola, o LE na aumaia le ola.
- iii). tuluiga - itu uma (o le lalolagi), o se mea mamao,
- iv). sofao - o se mea fai faili o le pu i aso nei.

**GALUEGA FAATINO:** Faailoa mai upu o lo o i totonu?

|   |   |   |   |   |   |   |   |
|---|---|---|---|---|---|---|---|
| A | I | O | L | E | N | I | T |
| S | L | F | A | A | O | L | A |
| A | N | A | K | U | F | S | V |
| V | S | E | L | L | A | A | I |
| O | O | S | N | A | P | N | T |
| P | F | E | T | O | G | I | A |
| M | A | N | A | T | U | A | E |
| R | O | K | I | T | A | R | A |

- (i) Upu e uiga ma le pepese fiafia ma leotele.
- (ii) Upu faavae (upu e maua mai ai) le faaolataga?
- (iii) F3 – Na ia \_\_\_\_\_ lona alofa ma lona faamaoni i le aiga o Isaraelu.
- (iv) O mea fai faili o lo o ta’ua i le tusi faitau (2 upu).
- (v) O ai e ana upu o le pese sa faitauina? (Tusia le tusi)

Tali:

- (i) ALALAGA
- (ii) FAAOLA
- (iii) MANATUA
- (iv) KITARA, SOFAO
- (v) TAVITA

**PESE:**

Alalaga ia, pepese fiafia

Ua taunuu valoaga sa valoia  
Ua fanau le tama, o le faaolataga  
Tagata kerisiano ala ia ma alalaga

Po Filemu, Ua pupula le fetu  
E fai ma taiala i le au makoi e saili i le tama  
Alalaga ia, pepese fiafia  
Ua taunuu valoaga sa valoia.

**A’OA’OGA:**

- 1. Ia iloa ona faafo’i le viiga i le Atua.
- 2. E maua i le Atua le fiafia e le uma.
- 3. Tatou pepese fiafia ua fanau mai le tama o le faaolataga.

.....

**ASO SA :** **13 TESEMA 2015**

**MATAUPU :** **O LE PESE A MARIA**

**SINI:** Ia a’oa’oina le fanau ia malamalama o le pese a Maria ua fa’aalia ai lona agaga faafetai ma lona loto ua vivi’i a’e i le Alii, ona ua tofia o ia e fanau mai ai Iesu.

**TUSI FAITAU:** Luka 1: 46 – 55.

**FESOASOANI MO FAIAOGA:**

O Nasareta o se tasi o aai i totonu o Kalilaia, o le nuu lea sa nofo ai le tasi taupou (teine e le’i faia se toalua) o Maria lona igoa. Ona sau ai lea o le agelu a le Atua ma le feau ia te ia. (silasila i le f-30-31). O le feau lea na faateia ai Maria, auā e le o talitonu lona loto e soos fanaua se tama tane ona e lei faia sona toalua. Na faamatata e le Agelu

le tinā ia Elisapeta, o le tagata lea ua faamaonia ai le moni o le fa'aaliga a le Agelu. O Elisapeta o le tinā ua matua, a o le tinā lea sa fanau mai ai Ioane le papatiso. Sa fa'aali foi i ai le agelu a le Atua.

Ona alu lea o Maria i le atu mauga o le tasi aai o Iuta, o le nofoaga lea o lo o nonofo ai Sakaria ma Elisapeta. O lona faamoemoe e fia talitonu i le fa'aaliga a le agelu. Ina ua uma ona la talanoa ma Elisapeta, sa lagona ai e Maria le Agaga faafetai i le Atua ona ua fa'aaogaina e le Atua lona faatauva e ala mai ai le pepe o le Faaolataga.

O le lagona fiafia o Maria ina ua alofaina o ia, lea na mafua ai loa ona ia pese i upu e pei ona faitauina. O pesega o isi ia auala e fa'aali ai lagona, ae le tasi foi se lagona. A fiafia ua pese, a faanoanoa foi pe mafatia ma ita, e mafai foi ona pese. Peitai o le pese lea a Maria, ua mautinoa lava e na o le lagona o le fiafia. Ua fiafia ona ua "*silasila mai o ia i lana Auauna fafine, faa-amuia mai o tupulaga uma ia te a'u, aua o Le e ona le mana ua faia e ia mea silisili mo a'u,*"

O le ala foi lea o le lauiloa o Maria ma ua oo mai lava i le taimi nei (autupulagā) o lo o tatou faamanatu pea le fanau mai o Iesu le Faaola mai ia Maria le taupou. O le pepe o le faaolataga, ua na togiola i agasala a le lalolagi atoa uma.

### Uiga o Upu:

- i). vivi'i - tuuina atu, fiafia,
- ii). Silasila - vaai, iloa mai,
- iii). Faamaulaloina - faatauva'a, tulaga maualalo,
- iv). Fa'a 'amuia - viia e tagata uma, fiafia iai tagata.
- v) matata'u - fefe, usita'i, mulimuli.
- vi). Au tupulaga - e manatua pea i soo se taimi lumanai, e le galo e oo i le faavavau.
- vii) faataapeapeina - faatoilaloina, faaleagaina.
- viii) tulei - aveese, unai ese.
- ix) fagaina - tu'uina i ai, aai, taumamafa.
- x) aufuaina - leai ni meaai, mativa.

### GALUEGA FAATINO:

Manaia foi ae fai se faatinoga pu'upu'u o le tala: (Tagata: Maria, Agelu, Elisapeta)

Agelu: *"Maria e, aua e te fefe; aua ua alofaina mai oe e le Atua, o le a to oe ma fanauina se tama tane, e te faaigoa ia Iesu"*

Maria: *A faapefea le mea nei, aua ou te le iloa se tane.*

Agelu: *E afio ifo le Agaga Paia ia te oe, e faamamalu foi le mana o le silisili ese*

Maria: *Ou te le talitonu i lenei faaliga.*

Agelu: *O Elisapeta le loomatua o lou aiga, ua fanau o ia ina ua ta'ua o ia e pa.*

Maria: *Oi aue, faauta o a'u o le auauna a le Alii, ia faia e tusa ma lau fetalaiiga.*

(Agai Maria i le aiga o Elisapeta e fia mautinoa – ma feiloai fiafia ma Elisapeta)

Maria: *Talofa Elisapeta*

Elisapeta: *Talofa Maria (faia ni taga e iloa ai le sooso o le tama i le manava)*

Maria: *Na ou sau ou te fia mautinoa le fa'aaliga na oo mai ia te a'u, ona e faapei foi ona tupu ia te oe.*

Elisapeta: *E moni Elisapeta o lea ou te iloa – Amuia oe i fafine, amuia foi le o le a fanau mai ia te oe.*

Maria PESE A MARIA – *Vivii lou loto i le Alii, olioli lo’u Agaga i le Atua lo’u Faaola, aua ua silasila i lana auauna fafine ua faamaulaloina.*

**PESE:** Na aumai e Iesu se pese  
Tuu sao mai luga  
Na ia iloa se pese faafetai  
E lagi ai lona alofa

I lo’u loto ou te pese ai pea  
Ou te pese ai pea i le lagi i luga  
I lo’u loto ou te pese ai pea  
Ou te pese ai lona alofa.

**A’OA’OGA:**

1. E fa’aaogaina e Iesu lo tatou faatauva’a.
2. Faia e Iesu mea sili mo tatou uma.
3. Pepese fiafia ua fanau mai le pepe o le Faaolataga.

**TATALO:**

Faafetai tele lava le Alii e le Atua, ua malie lava lou alofa mo i matou le fanau, ua aulia mai le Aso Sa mulimuli o a matou aoga o lenei tausaga. Alofa ma faamagalo o matou sesē. Tausi mai ina ia matou maua se Kerisimasi fiafia, ma aulia lenei tausaga fou i le manuia. Amene.

.....

*IA MANUIA LE KERISIMASI 2015  
& TAUSAGA FOU 2016*